

# KUSALULULWA KWA MUSONGWA



Bavula bantu bakolwa. Amiwa kechi nakonsha kufika ku bantu bonse pa kimye kimo ne. Bino, telekai.

<sup>2</sup> Amiwa kine nji nalusekelo kwikala kuno jibiji, bufuku buno, mu kino kishimikwa kyawama, mukachi ka jibumba ja bantu bawama. Kabiji twakwiyanga na kutwela, kuno, bimye bicheche byapita, bantu baimana mu mukwakwa baamba mba kechi bakonsha kutwela mukachi ne. Kabiji Naambile mba, “Kyawama, kape Nakonsha kwimumwena bifulo bimo.” Kabiji kechi bakonsha kwibaleka batwela mukachi ne. Nanchi Amiwa mundekeleko mambo kechi tuji na kifulo kyabo ne. Baamba mba kibamba kyapeulu kyayula, ne akyo. Kabiji tulekelaike mambo pa kyokyo. Pakuuba tuji nalusekelo pa kwikala kuno, kabiji twasekela pa kumona jonse je jibumba ja bamingilo, banabalume basulu muno, kabiji anweba bonse benyi bafuma mu mampuzha apusanapusana mu kyaalo.

<sup>3</sup> Najinga na jishuko ja kwamba lukeelo luno pa kajo kakwiaula, akyo Amiwa nekisachila bingi ke kyamunema pakuuba mba naamba ku bantu bawama byobya. Najinga pa mutwe wa kuuba mba: *Jikuzhi Kechi Jikaswana Pamo Na Wichi Ne*. Amiwa kechi na mupwishishe ne. Kabiji kechi kyajinga lu—lukatazho lwa mulongo ne. Aye waesekele kwambila bakalama mba betuleke twikaleko kimye kyabayako, pakuuba kechi wakonsheshe kwikyuba ne. Amiwa kine nasachila kyokyo, Mulongo Demos. Akyo kiji, kiji kyawama bingi. Amiwa kine nemusachila pa lusa lweni, anweba bonse. Bino abo kechi balekele twikyuba ne. Nanchi atweba twa—twapwishishetu. Amiwa katwajijila na kyokya, kimye kikwabo, pakuuba mba nkapwishe: *Jikuzhi Kechi Jikaswana Pamo Na Wichi ne*. Bushe mwikyumuwine nyi, anweba mwajinga kuno? Naketekela mba byajinga byavula byakonsha kumvwanika.

<sup>4</sup> Bino, Nayuka, bufuku buno, kuji jibumba ja bantu, ne ajo, nanchi Amiwa kechi nasaka kwimulama muno pa kimye kyabaya kilengele anweba mupuswe pa kikye ne. Mambo, Nalanguluka mba akyo kyajinga kintu kyanema bingi ku—ku bantu ba ki Pentekosito-baitabila, aja jibumba jo twamwene bufuku bukwapo. Aja ke jibumba ja banabalume bawama bingi, baji na mikumbu yawama, yapeela. Kyandengela amiwa kumvwa bingi bulongo, pa kumona kyokya. Naketekela mba aye Nkambo usa kwikipesha, bufuku buno. Kabiji yense wakonsha kwikimona, lekai baketekele. Ayo yo milombelo yami ya bukishika.

<sup>5</sup> Kabiji kuji masakwa avula abena kwiya, leelo, mu makalata ne mafoni, a bavula babukwa mu kuno kupwila. Najinga bingi

na lusekelo na kyokyo. Pa, pa, kumona bantu bakolwa, awe ye musango wa mwingilo wami.

<sup>6</sup> Ami—Amiwa ngiya kuno na kusapwila. Amiwa, anweba mwayuka, Amiwa kechi ne musapwishi ne. Bino Ami, na kikye, na mulaka wami wa ku Kentucky, “wanji, kechi ibyo ne” kabiji—kabiji byonse byo byambo, nanchi Ami—Amiwa kechi nakonsha kwamba nobe byotutela musapwishi waleelo wakataka ne. Amiwa—Amiwa kechi nakonsha kutola kyokya kifulo ne, mambo Ami—Amiwa kechi nafunda ne.

<sup>7</sup> Bino Amiwa natemwa kwamba byo Nayuka pa Kikye, ku bakwetu, nangwa byo Ng’umvwa mba Amiwa Nayuka pa Kikye, ku bakwetu, Amiwa byo Nebifunda, Aye byo aji kwi amiwa. Aye bo bumi bwami bonse, musango yense Ye nakonsha kuketekela kwikelamo, kabiji nanchi ne byakilapo pa byo Ndanguluka, kyakuuba mba Amiwa nkekala na mulunda, nangwa pachechetu ne, panopantanda, byo Najinga nsongwalume mucheche. Bino kine Nasata bingi pa balunda bakatampe bavula leelo.

<sup>8</sup> Amiwa . . . [Mulongo waamba mba, “Tuji na lukatazho lwa kumvwa kunyuma, Mulongo Branham. Bwela pepi.”—Waku.] Oo, ndekelaiko mambo. Ami—Amiwa kiji nobe nafuma mundonda, kuntu kumo, aye byo aambile.

<sup>9</sup> Pano, twayai tuye mu byambo, twayai tuzhikule ne kutanga mu Kinembelo. Amiwa—Amiwa kimye kyonse natemwa kutanga Baibolo, mambo Ke Kyambo kya Lesa. Naketekela kyokyo. Kabiji Amiwa Nekiketekela mba kyo Kyambo kya Lesa kibula kwaluka. Kabiji pano Njina Binembelo bicheche byanembwa papo, kabiji byanembwa bimo byo Nakonsha kutemwa kutazhako, pa kimye kicheche, kapepo pa mamineti fote-faivi.

<sup>10</sup> Kabiji pano tusakufumamo bukiji tuye nakumona jije jibuba bufuku buno ne jikwabo. Kabiji Naketekela mba Lesa usa kutwajijila na kwimupesha nangwa byonkabyo. Kabiji Nayuka kyo mwafwainwa kuuba. Kabiji Nafwainwa kwendesha kuya ku Tucson, nangwa byonkabyo, bufuku buno, mwamona, nanchi mwafwainwa kulangulukapo. Ao ke mawala teni akwendesha.

<sup>11</sup> Kabiji Amiwa mbena kuya ku bushiya bwatulunga, kabiji Nafwainwa kutambula nguya ya kikola kya mashika a kibobo kupeswapeswa ku kafulumende mu kimye kya lukeelo keelo. Nanchi Na—Nafwainwa kufika kokwa. Najinga nayo yatutulwilwe, juba jikwabo, kabiji abo kechi bakaswa mukumbu wa ine “ine” kwikala mukumbu jibiji ne. Kabiji Amiwa njina byavula tetanasi ne taifasi bya kutambula, kabiji ne bya kupana ngovu.

<sup>12</sup> Nanchi, Amiwa, nasata bingi pa jije jishuko, kabiji—kabiji ne kukwe kupwila kwawama nkotwajinga nako kupwila kwa mimba kasa kukyanyge kwikalako. Kyandetejile bingi

lusekelo ku muchima wami. Anweba mwi bantu bawama bingi. Naketekela mba Lesa ukemupesha.

<sup>13</sup> Umvwe kimye kikatampe. . . Awa muloolo mukatampe uji kokwa, awa witaile aye mwine ku Alaska, mooba acheche apitapo, wajikutaya lumizo wanji ne jikwabo lukeelo luno, monka, mwaya Washington. Aye wakonsha kutala jino, kyapela bingi. Kabiji inge Mupashi Wazhila wambula kyakine. . .

<sup>14</sup> Muntu umo waikala mukumbu. . . wangipwizhenga mba, “Bushe kikamwekela kuno nyi, Mulongo Branham?” Ine, kechi Nayuka kyokyo ne. Amiwa kechi nayuka ne, kanatu Nayuka. Abo bo bukine.

<sup>15</sup> Amiwa kimye kyonse nkeba kwikala wakishika kwi anweba. Amiwa kechi sakufwanyikizhatu ne, kusendatu milanguluko, nangwa bamo, byo Naketekela, nangwa kintu kimo kiji nobe byobyoyo. Inge Amiwa ne mubuula, abyoyo byo kikekala. Kyawama, Aye wafwainwa kumbula, patanshi, bino apa Amiwa ne mubuula. Na—Nayuka mba ntanda yonse iji mu musango wakukenya. Atweba tuji mukimye kya kumpelo. Bino kintu kimo kyo Naeseka kwikala. . .

<sup>16</sup> Mulongo Shakarian waji kwambanga lukeelo luno, byo apitanga mu mulaini wa milombelo, kabiji wafika moomwa watola byobyoyo bitupa bantu kasa bakyangye kwiya, kabiji wabwela watalapo, kabiji wamona kana—kana Nebabuula byo bafwainwa kunembapo. Banembapo misango ya bintu byonse pa bitupa byabo bya milombelo, mwayukatu, kabiji wakebelengatu kumona kana bijitu bulongo. Aye waambile mba, kufuma pa ma aduleendi byo amwenepo, kechi pajingapo nangwa kimo kiyatama ne. Kechi kukekalapo kintu nangwa kimo kiyatama ne, monai, mambo, kyo—kyo kyakwa Lesa. Inge Amiwa ne bikamo amiwa mwine, nanchi kikala kiyatama ponkapotu.

<sup>17</sup> Nsongwakazhi mucheche ao bashanji baikala muno, babena nkuteleka pakino kimye, baishile kwi amiwa, kechi papita kimye kyabaya ne. Aye wajinga na kiloto. Waambile mba, “Mulongo Branham, akye kiloto kyalumbululo ka?”

<sup>18</sup> Naambile mba, “Amiwa kechi nayuka ne, nyenga. Nafwainwa kuyuka, inge Nkambo wakonsha kumbula.” Nanchi Amiwa naile kulutwe na kumwipuzha Nkambo, kabiji Aye kechi wambujile ne.

<sup>19</sup> Aye nsongwakazhi wabwelele jibiji. Waambile mba, “Kyawama, pano kilumbululo kya kiloto kyami kyepe?”

<sup>20</sup> Naambile mba, “Iya kuno, mutemwe, ikala panshi.” Naambile mba, “Ba shobe ne bainobe ke batemwe bami bawama bingi. Mwamona? Kabiji baenda lwendo lonse kufuma ku Canada, bakokoloka, kabiji baiya kuno pamo ne amiwa. Abo baketekela kikye, kyo Mbena kweseka kwamba. Kabiji kechi Naambapo kintu kiyatama ku muntu ne, kyakwikebelatu, mu bumi bwami ne. Inge Na. . . Nalanguluka mba Nayuka kiloto

byo kyalumbulula. Bino kanatu Namona akya kiloto amiwa mwine, bino apa Aye wambula byo kyalumbulula, Amiwa kuuba ne mubuula ne. Monai, inge Amiwa nalengatu kintu kimo, kwakonsha kwikala kimye kimo kyo mwafwainwa nkukeba pakachi ka bumi ne lufu, kabiji pano kechi mwakonsha kuyuka kana mwakonsha nkuketekela nangwa ine.”

<sup>21</sup> Inge Nakubuula kintu kiji kyonse mu Jizhina ja Nkambo, kyakine ikyo. Akyo Iye wambuujiile. Kabiji nanchi, pa yonse ye myaka, monse monse muntanda, kabiji kuzhokoloka ntanda, Kikyangye kwikalapo kyatama nangwa jimotu ne. Mambo. . . Kabiji, pano, mwayuka mba muntu kechi wakonsha kwikala kwa kubula kuuba bilubo ne. Kisendatu Mupashi wakwa Lesa pakuuba mba ube kyokyo.

<sup>22</sup> Kabiji pano Njina Mbila yo Njipo na nsambu. Kabiji bimye byavula Amiwa bamona kwikala, mukachi ka bantu, kyawama, kapepo muntu umo kechi wakilangulukapo mineti umo ne, amba Amiwa ne—ne, oo, ne muntu watama, amba Amiwa kechi natemwa bantu ne, kabiji amba kimye kyonse Amiwa nebachibaulatu. Kabiji akyo kechi byo kiji ne. Abyo kechi byokiji ne. Natemwa bantu. Bino, mwayukatu, butemwe boolola.

<sup>23</sup> Inge nsongwalume wenu wamucheche waikala mu mukwakwa, kabiji waamba mba, “Junya, mutemwe, Amiwa kechi nakeba obewa kwikala momo ne, bino. . .” Kabiji myotoka kasa ipitang’ana kwipi ne aye, kabiji wa mufumyamo. Aye wabwelamo ne jikwabo. Kika, obewa wafwainwa ku moolola. Inge wamutemwa, wakonsha. Obewa wafwainwa kwikyuba.

<sup>24</sup> Inge wamona muntu ubena kuya mwaya mukola, kutala kuji mpota, mu kabwato ka kacheche, kasa wayuka mba abwa bwato bubena kuya na kuloba inge bwafikila mu mpota, mwakonsha kwamba mba, “Yoano, obewa, kape wafwainwa kulanguluka pa kakimye kacheche, kapepo kechi wakonsha kwikyuba ne”? Inge Amiwa nayuka mba kechi wakonsha kwi kyuba ne, Amiwa nakonsha kumusukenya wafumamo mu bwato, inge Nakonsha, mambo ke butemwe bwikyuba.

<sup>25</sup> Kabiji pano, mu iye Mbila yo nsapwila, Amiwa kechi ngeseka kubikamo lufunjisho luji lonse ne, nangwa bikwabotu ne. Amiwa—Amiwa nguba kyokyo mu kipwilo kyami. Bino kuno mukachi ka banabalume ne banabakazhi baji na madinominesheni apusanapusana ne milanguluko yapusanapusana, Amiwa ngesekatu kuleta biji mu musango wa pakachi, nalondolola; bino pakatampe kyakuuba mba inge wasemwa na Mupashi wa Lesa, Naketekela mba obewa wakonsha kukwatakanya kyo Nalumbulula, mukachi ka banabalume ba Bwinakilishitu, Methodist, Baptist, Presbyterian, nebi-kwabotu.

26 Pano, bufuku buno, Nasaka kuzhikula mu Ntendekelo, kyapitala kyabu 24. Nasaka kutanga pa . . . kutatwila pa veeleshi wabu 12 wa kyapitala kyabu 24 kya Ntendekelo.

*Kabiji walombele mba, Anweba YEHOBA Lesa . . . wa nkambo yami Abulahama, Nasasapo namba, banshukishe mu jino juba, bamumweshe lusa nkambo yami Abulahama.*

*Talai, Amiwa naimana konka kuno kwipi na ku mushima wa meema; kabiji baana babakazhi ba mu ye uno muzhi babena kwiya na kutapula meema:*

*Kabiji lekai kifikizhiwe, kuuba mba awa kamwale ye Nsakwambila namba, Tulai panshi awa mulondo, Ne mulomba anweba, namba Amiwa ntomemo; kabiji ne aye waamba mba, Tomai, kabiji Amiwa nsakupana byakutoma ku bangamela benu ne abo: lekai awa ekale iye ye mwamutongwela wa mwingilo wenu Izaka; kabiji mu kyonka kino Amiwa kayuka namba anweba mwamweshwa lusa kwi . . . nkambo yami.*

27 Kabiji pano mu Buuku wa Lumwekesho. Awa ye mutanshi mu Baibolo, Ntendekelo. Pano, mu wapelako mu Baibolo, Nasaka kutanga mu kyapitala kyabu 21 kya Lumwekesho, ne veeleshi wabu 9.

28 Twayuka kikyeye Kinembelo kya mu Ntendekelo papo . . . Anweba tangai kyapitala yense, inge mwakeba. Ke Lesa ubena kutuma Elieza. Nangwa, Abulahama ubena kutuma Elieza, mundekeleko mambo, na kusala musongwa wa kwa Izaka. Kabiji ne walamba Rebekah wamwekele, kabiji mukupana mukumbu walumbuluka ku milombelo ya—ya kwa Elieza, kalume wakwa Abulahama, yo alombele.

Pano mu veeleshi wabu 9 wa kyapitala kyabu 21 kya Lumwekesho.

*Kabiji kwaishile kwi amiwa umo wa aba bamalika sebeni bajinga na michiba sebeni ya myalo yampeleleko sebeni, ne aye wang'ambila, mba, Iya kuno, kabiji Nsakukumweshwa musongwa, muka Mwanamukoko.*

29 Pano Nasaka kutola mutwe, bufuku buno, pa kyokyo: *Kusalululwa Kwa Musongwa*. Kabiji aye iyo, inge mulongo ulekonda kuno wakonsha, awe ye tepu ye mwakonsha kutwajijila kulupula.

30 Kabiji pano, mu kikyeye, kechi kyalumbulula mba Mbena kwamba ku kino kipwilo kiji muno ne, pakuuba ao matepu aya mwaya ntanda. Atutululwa kutwalwa mu, monse monse, oo, milaka yonse yavula, kufikatu ne mu bantushi monse mwaya ntanda. Tuntuma matepu, atuntu, na bukwasho bwa kipwilo. Kabiji ekala atutululwa. Kabiji monse monse mu masaka a mu

Africa, kabiji ne ku India, kabiji ne kuzhokoloka ntanda, kuya ao matepu.

Pano, kasalululwa kwa Musongwa!

<sup>31</sup> Mu bintu byavula bya mubumi tupewa kusalulula. Jishinda ja bumi, ajo jine, ke kusalulula. Tuji na nsambu ya kufukula jishinda jetu atweba bene, tusalulula jishinda jetu atweba bene jo tubena kukeba kwikalamo.

<sup>32</sup> Kufunda ke kusalulula. Twakonsha kusalulula kana tubena kukeba kufunda nangwa ine, nangwa kechi twakonsha kufunda ne. Ako ke kusalulula nkotuji nako.

<sup>33</sup> Kyawama ne kyatama ke kusala. Yense mwanamulume, yense mwanamukazhi, nsongwalume ne nsongwakazhi, bafwainwa kusala kana babena kukeba kwikala bulongo nangwa kubula kwikala bulongo. Ke kusalulula.

Kusalulula ke kintu kikatampe.

<sup>34</sup> Ko ukatanwa mu Peenape ke kya kusalulula. Kabiji kapepo, bufuku buno, anweba bamo musakuuba konkwa—konkwa kusalulula, kwa komukekala mu Peenape, kuno kupwila kasa kukyangye kupwa bufuku buno. Kukekala kimye kimo, kya kuuba mba, inge wakana Lesa bimye byavula, kukekala kimye kimo Aye kyo ukamukana japelako. Kuji mulaini pakachi ka lusa ne luzhachisho. Kabiji ke kintu kyatama bingi ku mwanamulume nangwa ku mwanamukazhi, nsongwalume nangwa nsongwakazhi, kukiluka pa yewa mulaini, kechi kuji kubwela kunyuma ne inge wakiluka awa mulaini wapelako. Nanchi, bufuku buno, kyakonsha kwikala kimye akyo bavula kyo—kyo basakufukula, nkobakekala mu Peenape wabula mpelo.

<sup>35</sup> Kuji kusalulula kukwabo nkotuji nako mu bumi, ko kuuba mba, kusala kwa mulunda wa mubumi bobo. Mwanamulume ukitwala nangwa mwanamukazhi ukitwala, ubena kutwela mu bumi, wa—wapewa nsambu ya kusalulula. Awa mwanamulume ukitwala usala. Awa mwanamukazhi ukitwala uji na nsabu ya kwitaba nangwa kukana. Nangwa byonkabyo ke kusala, ku lubaji lonse lubiji. Bonse babiji mwanamulume ne mwanamukazhi, baji na nsambu ya kusala.

Kabiji, uji na kyakusala, nobe Mwinakilishitu.

<sup>36</sup> Obewa uji na nsambu ya kusala kipwilo, muno mu America, pakino kimye, ko wakonsha kuya. Ajo ke jishuko jobe ja Bwinaamerica, ja kusala kipwilo kiji kyonse kyo ukeba kutanwako. Akwa ke kusala. Obewa kechi wakonsha kuya kuji konse ne, inge kechi ubena kukeba ne. Pakuuba inge ubena kukeba kupipula kufuma ku Methodist ne kuya ku Baptist, nangwa Katolika kuya ku Polotesitati, ne bikwabotu, kafwako nangwa umo wakonsha ku kubuula nangwa ku kulengela obewa kuya ku kipwilo kiji kyonse ne. Ayo yo—yo nsambu

yakukasuluka. Abyo byo iji nsambu yakusala kwetu. Muntu yense wakonsha kwisajila aye mwine. Bwanabwabene bwa bupopweshi, kabiji akyo ke—ke kintu kikatampe bingi. Lesa etukwashe pakuuba mba tutwajijile na kwikilama.

<sup>37</sup> Obewa kabiji wakonsha kusala. Nangwa . . . Inge wasala kino kipwilo, wakonsha kusala kana obewa, mu kino kipwilo, kana wakonsha kusala kipwilo kikakutangijila kuya nkoukekala mu Peenape. Obewa wakonsha kusala kipwilo kiji na lufunjisho lumo lwa bantu, kyo wakonsha kulangaluka mba alo lufunjisho lwa bantu lo ukeba. Nangwa, kipwilo kikwabo kiji na lufunjisho lwabo lwa bantu.

<sup>38</sup> Kabiji kuji ne Kyambo kya Lesa, obewa uji na nsambu ya kusala. Obewa wafwainwa kusalulula.

Kuji muzhilo wabulwa kunembwa mukachi ketu, wakusalulula.

<sup>39</sup> Naketekela kyajinga Elaija, kimye kimo, apa pa Mutumba Wakamela, panyuma ya kubekya, mu kyokya kimye kya lukatazho kyo tuji nakyo pepi kufikako pakino kimye. Kabiji kapepo, kyafwainwa kwikala kwi obewa nangwa Amiwa, bufuku buno, amba tusalulule, pamo nobe kyamwekele pa Mutumba Wakamela. Kwamba patoka, Naketekela mba kibena kutwajijilatu, ntanda yonse, ponkapano. Pakuuba katatakatu kukekale kimye kyo wafwainwa kusalulula.

<sup>40</sup> Kabiji anweba banabalume muji muno, mu bipwilo byenu bya madinominesheni, anweba ketekelaitu kikye, amba kimye kijitu pe obewa, kyo wafwainwa kusalulula. Obewa ukaya Mukije kya Ntanda yonse, nangwa obewa kechi ukatwajijila kwikala dinominesheni ne. Obewa ukooba kyokyo, kabiji akwa kusalulula kujitu pepipepi.

<sup>41</sup> Kabiji ke kintu kyatama kupembelela kimye kyapelako, ne apo, mambo wakonsha kutola kintu kimo kyo mwakonsha kubula kwifumyakyo ne. Mwayukatu, kuji kimye kyo bakonsha ku kujimuna, bino, inge wakiluka pa yewa mulaini walujimuno, nanchi obewa wabikwa kala kayukilo kulubaji lukwabo, wabikwa kayukilo.

<sup>42</sup> Vulukai, inge mwaka wa yubili waiya, kabiji aye—aye pulisiti wazhokolokanga na ntolopita yanji, amba muzha yense wakonsha kwikala ke mwanawabene. Pakuuba inge wakakalwa kuswa bwanabwabene bwanji, nanchi aye bamutwalanga ku tepo, kujishiki, ne kusaba kutwi kwanji na lusinge, kabiji pano ke wakwingijila nkambo yanji kikupu. Kyabikwanga ku kutwi kwanji nobe kipasha, kyakumvwa. “Lwitabilo lwiya pa kumvwa.” Aye waumvwine aya tolopita, bino kechi wakebelenga kwi kiteleka ne.

<sup>43</sup> Kabiji bimye byavula, banabalume ne banabakazhi bomvwa Bukine bwa Lesa, kabiji Bekimona kyaikajikwa ne kyashinikishiwa mba, Bukine, bino nangwa byonkabyo kechi

bakeba kwi Kyumvwa ne. Kuji ene mambo akwabo. Kuji kusalulula kukwabo kobauba, kukila kutalang'ana na Bukine ne binshika, onkao mambo matwi abo akonsha kushikika ku Mamboawama. Abo kechi Bakeomvwa jibiji ne. Bukwashi bwami kwi obewa, inge Lesa waamba ku muchima obe, waingijilapo ponkapatu.

44 Elaija wibapele kusala, ko bafwaijilwe kuuba: “Salululai jino juba ye musa kwingijilanga. Inge Lesa ye Lesa, mwingijilai Aye. Inge Baela ye Lesa, mwingijilai aye.”

45 Pano, nobe byo twamona mba byonse bya ku mubiji ke bipasha bya bintu bya bumupashi, nobe byo twajikupitamo mu lufujisho lwetu lukeelo luno, nobe juba ne musango wani. Akyo kyajinga Baibolo wami mutanshi. Kasa kyangye kutangapo jibula nangwa jimo ja Baibolo ne, Amiwa na muyukile Lesa. Mambo, Baibolo wanembwa konse konse mu bilengwa, kabiji byendelatu pamo na kyambo kya Lesa: byo luji lufu, kuzhikwa, lusanguko lwa bilengwa; kabiji ne kusela kwa juba, kukilang'anya kwajo, kuzhika, kufwa, ne kubuka jibiji. Kuji bintu byavula bingi byo twakonsha kupashako, Lesa mu bilengwa, abyo twafwainwa kukilukapo, mu ino Mbila.

46 Pano, inge bya bumupashi, nangwa, inge bya ku mubiji byaikala ke bipasha bya bumupashi, nanchi, kusalulula kwa musongwa, ku mubiji, ke kipasha kya kusalulula Musongwa, aye Musongwa, mu bumupashi.

47 Pano, ke kintu kyabaya bingi inge waya nakusala mukazhi, mwanamulume, mambo bachipa luchipo amba “kafwako kwabana ne posotu lufu.” Kabiji abyo byo twafwainwa kwi kilama. Kabiji wachipa lolwa luchipo ku meso akwa Lesa, amba kanatu lufu lo luketwabanya. Kabiji Nalanguluka mba twafwainwa... Mwanamulume uji mumilanguluko yanji yawama, ubena kunengezha lutwe lwanji, wafwainwa kusala awa mukazhi na kuntako bingi maana. Ikalai bajimuka byo mubena kuuba. Kabiji mwanamukazhi kusala mulume, nangwa kwitaba kusala kwa mulume, wafwainwa kwikala wantako muchima ku byo abena kuuba, kabiji kukijishamo ano mooba. Mwanamulume wafwainwa kulanguluka ne kulombapo kasa kyangye kusala mukazhi.

48 Nalanguluka mba, leelo, kiji na... Kuji mambo avula a kwikana, kyakuuba mba atweba twatangilako kulutwe mu America, mu mambo akwikana. Atweba twatangila kulutwe mu ntanda yonse. Muji kwikana kwavula bingi muno kukila kuji konse, mu kino kyaalo, kyonka kyafwainwa kwikala, kilangulukwa mba, kyaalo kya Benakilishitu. Ke buvu bingi, mu bije byetu byakwikana! Nalanguluka mba, ene mambo a kikyee, ke kyakuuba mba banabalume bafuma kwi Lesa, kabiji ne banabakazhi nabo bafuma kwi Lesa.



49 Kabiji twatana kuuba, mba, inge mwanamulume walombapo ne mwanamukazhi naye walombelep; kechi kumonatu meso awama ne, nangwa bipuzhi byawama byabaya ne, nangwa biji nobe byoobya ne, nangwa buwame bumo bwa muntanda ne; pakuuba bafwainwa kutala patanshi kwi Lesa, ne kwamba mba, “Lesa, awe ye mutanchi Wenu ni?”

50 Amiwa nalanguluka mba, leelo, kuji kubepa kwabaya bingi, kijitu pamo nobe mu sukuulu. Byo—byo beya banyike, alwa lukeelo, bavula banyike bamukikalakulo, aba—aba balunda nami, beya ne kwamba mba, “Mulongo Branham, usa kwitulombelelako nyi? Tuji na—na lweseko leelo. Amiwa—Amiwa naingijile bufuku bonse, kabiji Amiwa kechi namona mba Nakonsha—nakonsha kupwisha ne. Ndombeshaipo.” Naketekela mba yense mwanayike wa sukuulu, inge kyakonsheka, inge... Kabiji basemi pa tebulu wa lukeelo, bakonsha kwamba mba, “Maama, Yoano uji na lweseko leelo. Twayai tumulombeleleko.” Nalanguluka mba kyakonsha kufumyamo byonse byo mwakonsha kuuba mujishinda jikwabo, nangwa kutala pa kipepala kya muntu mukwabo ne kubepa bubela, Nalanguluka mba, inge mwafumamo ne kulombelela pa lukatazho.

51 Kabiji inge twakonsha kufunda kyo tubena kuuba umvwe tubena kukeba kusongola, inge twasala mukazhi wetu, mulume wetu, inge twakonsha kwikifunda kyonse! Mwanamulume wafwainwa kulomba na muchima yense, mambo wakonsha konauna bumi bwanji bonse. Vulukai, alwa luchipo luji mba “poso lufu kwabana ne,” kabiji wakonsha konauna bumi bwanji namambo a kusala kyatama. Bino inge aye wayuka kine kintu, aye wasala kintu kingi kabiji ubena kusongola mwanamukazhi ao wabula kufikilamo kwikala mukazhaji, nangwa byonkabyo aye wikyuba, nanchi ke mambo anji. Inge mwanamukazhi wasenda mwanamulume kabiji wayuka mba kechi wafikilamo kwikala mulume wangi ne, nanchi aa ke mambo obe, panyuma ya kuyuka kyawama ne kyatama. Nanchi, kechi wakonsha kwikyuba ne kana walombelelapo bulongo.

52 Kimotu kyubiwa pa kusalulula kipwilo. Pano, obewa wafwainwa kulombelela kipwilo akyo kyo ubena kukwatankana nakyo mu lumvwang’ano lwa bupopweshi. Vulukai, bipwilo bisenda mupashi.

53 Pano, Amiwa kechi nakeba kwikala walupata ne. Pakuuba Amiwa navuluka mba Amiwa ne mwanamulume mukote, kabiji Nafwainwa kufumapo, juba jimo. Kabiji Nafwainwa kukumbula mu Juba ja Buchibishi bwamambo pa kyo Ng’amba bufuku buno nangwa kimye kiji kyonse. Kabiji Amiwa, onkao mambo, Nafwainwa kwikala waketekela ne washininwa kyakine.

54 Bino, obewa uya ku kipwilo, kabiji umvwe watajisha byubilo bya kyokya kipwilo, obewa monatu kafunga mu kimye

kicheche, kabiji javula mukatana kuuba mba kipwilo kimweshwa byubilo bya kafunga wabo. Kimye kimo, Nakumya kana kechi tutambulatu mupashi wa muntu mukwabo mu kifulo kya Mupashi Wazhila ne. Mufika pa kibese kyakuuba mba kafunga uji na kamusango ne bintutu bikwabo, mwakonsha kutana mba ne kipwilo kyonse kyaikalatu mu jishinda jimo. Nakonsha kwimuleta ku kipwilo kimo Nkomona kafunga waimana, ne kupukunya mutwe wanji kulutwe ne kunyuma. Anweba monaitu kipwilo, ne abo bobatu kintu kimo. Mwatola kafunga, umina bintu lubilo, javujishatu kipwilo ne akyo kyubatu kintu kimo. Nanchi, inge Nasalulwilenga kipwilo, Nafwainwa kusala kyakinshika, kiji na lufunjisho lwalumbuluka, Mamboawama Onse, kipwilo kya Baibolo, inge Amiwa mbena kusala kimo mwakubika kisemi kyami. Kusala. Natajile. . .

<sup>55</sup> Bansongwalume, juba jikwabo, Mulongo Shakarian mwaana wanji kabiji ne muko-wanji-wamulume, batwajile kukwe na kulombelela mulunda umo wakyanyike, nyimbi, umvwala bingi bulongo. Popo abweleletu. . . Fred Barker, ajo jo jajinga jizhina janji, popo afuminetu palwendo. Kabiji bangichile, mba, “Fred ubena kufwa.” Kabiji ponkapo, Amiwa kasa kyangye kutwela mu nzubo ne, sawakya mukwabo wafikile mba, “Aye kape wafwa ne kufwa ponkapano.” Kabiji aye waambile mba wajinga na—na kikola kya mashi kubongo, kabiji lubaji lumo lwaubile kalepu, kabiji—kabiji wafwilenga, kabiji mukazhi wanji wakebelenga mba namulombelele.

<sup>56</sup> Kabiji Nalangulukile mba, “Oo, inge Nakonsha kweseka kutumbuka, wakonsha kufwa kasa Nkyangye kufikako, kabiji kape wafwa pakino kimye.” Nanchi, Naichile bukiji bukiji ne kukwatakana na inetu mucheche pa foni. Kabiji—kabiji twanungakenye ma foni, ku kutwi kwa Fred. Aye kechi waminynenga ne. Bamupele kyalengwa kya kuminyinamo. Kabiji byo twamulombejile, aye waambile mba, wasukene, wikisopwelepo pashingo yanji. Aye wakonsheshe kumina. Badokotala kechi bekitabijile ne. Abo bekifumisheko, kabiji wakonsheshe kumina. Aye waikela, juba jikwabo.

Kipwilo; kusalulula kipwilo.

<sup>57</sup> Foni popo ajikufikatu, pa kimye kicheche kyapitapo. Lukeelo luno, membela wa kipwilo kyami, ao kine ke mwanamukazhi waki Baptist kufuma ku Louisville, aye waji kufwa lukeelo luno. Kabiji kipwilo kyami ku muzhi, ke jibumba ja bantu bepana bingi, bapwijile pamo abo bene ne kuyako, bamatumbula kasa bakyangye ku mupombapomba, baimene po aji, balombelele poso bumi bwabwela mwi aye. Kabiji uji na bumi, bufuku bunu. Bakulumpe ba kipwilo kyami, kika, bafunjishiwa kuketekela mba bintu byonse byakonsheka kubiwa, baishile kwi Lesa na bukishika.

Nanchi, wafwainwa kusala kintu kyaitabilwa.

58 Ne jikwabo, musango wa mwanamukazhi ao mwanamulume ye akonsha kusala, usolola muchima wanji ne byubilo byanji. Inge mwanamulume wasala mwanamukazhi watama, kimweshwa byubilo byanji. Kabiji abya byo ekasa nabyo aye mwine, bimweshwa kyakine biji mukachi kanji. Mwanamukazhi usolola biji mu mwanamulume inge aye wamusala mba ekale mukazhi. Kimweshatu kiji mukachi kanji. Nangwatu ambe kyamusango ka pangye, monaitu ye asongola.

59 Amiwa naya ku ofweshi wa muntu, kabiji aye waamba mba ne Mwinakilishitu; byo abika pa bibumbulu konse konse, kabiji awa musango wa nyimbo ya kala ya mboo-mboo ibena kuvuma. Amiwa kechi nataka muchima ku byo aamba ne. Amiwa kechi naketekela lushimuno lwanji ne, mambo mupashi wanji ubena kuja pa bintu bya muntanda. Kika, kya kwamba mba, inge wasongola nsongwakazhi wanyimbilo, nangwa inge wasongola mwanamukazhi wabulalalale, nangwa walamba, mwekelo ya bukatataka? Kisolola, kimweshwa biji mu muchima wanji, kabiji ne bikekala nzubo yanji palutwe, mambo aye wamutolele mba aletelemo baana banji. Kabiji musango yense ye ajimo, ye musango ye akakomesheshamo baana. Nanchi, kimweshwa biji mu mwanamulume. Mwanamulume utola mwanamukazhi muyewa musango, kimweshatu byo alanguluka na lutwe lwanji.

60 Mwakonsha kulanguluka mba Mwinakilishitu wafwainwa kuuba kintu kyamusango yewa? Ine, mwane. Amiwa kuuba nekyuba ne. Wakine Mwinakilishitu kechi utala pa bainetu balamba, ne bansongwakazhi banyimbi, kabiji ne bainetu babulalalale ne. Aye utala pa byubilo bya Bwinakilishitu.

61 Pano, obewa kuuba waikala na bintu byonse ne, kwakonsha kwikalatu umo nsongwakazhi wakilapo kulamba, kabiji awa nsongwakazhi mukwabo, kapepo uji, kimino kyanji kimweka bulongo *kukila* yuwe, kabiji wafwainwa kupanapo umo bukitapisho pa mukwabo. Pakuuba inge aye kechi kyo kimino kya inetu ne, nangwa kya mwanamukazhi, kabiji aye uji... Amiwa kechi nataka muchima nangwa alambe nangwa ine, obewa wafwainwa kutala pa byubilo byanji, nangwa ekale walamba nangwa abule kulamba.

62 Pano, mambo, kitufwainwa, inge Mwinakilishitu wakonsha kusala mukazhi, aye wafwainwa kusala wakishika, mwanamukazhi wasemwa-jibiji, nangwatu ekale na mwekelo ya musango ka. Kiji ku byo aji, kyo kimulenga kwikala byo aji. Kabiji pano, ne jikwabo, akya kimweshwa byubilo byanji bya bulesa, kabiji kimweshwa biji mu milanguluko yanji ne byonse byo bikekala kulutwe, mambo kisemi kyanji kikaletwa na yewa mwanamukazhi, na mambo a ntachikilo ya kulutwe ya nzubo yanji.

63 Inge wasongola umo wabaabo bacheche ba byubilo byakatataka, bainetu babulalalale, kika kyafwainwa

kuketekelwa? Musango ka wa nzubo mwanamulume yo akonsha kuketekela kwikala nayo? Inge wasongola nsongwakazhi wabula byubilo byaitabilwa bya kwikala pa nzubo ne kulama nzubo ne, kabiji ukeba kwingijila mu ofweshi wa muntu mukwabo, wafwainwa kwikala kalama wa nzubo wa musango ka? Obewa ukekala na bakulama-baana ne bintutu bikwabo. Kyakine.

<sup>64</sup> Pano, Amiwa kechi ne umo wabaabo batemwa musango wabu katataka ne, wa banabakazhi bengila ne. Umvwe Namona baabo banabakazhi kasa bamvwa mayunifomu, kasa babena kupitang'ana mu uno muzhi, pa maonda, nobe bakapokola, ke kyabumvu mu muzhi uji yense mo bakonsha kuleka mwanamukazhi wauba kyokyo. Mwamona? Mwamona? Byo baji banabalume bavula babula mingilo, kimweshwa ndangulukilo ya katataka ya muzhi wetu. Kimweshwa kwibwezha panshi. Kechi twafwainwa kwikala na banabakazhi baji byobya ne. Kechi bajipo na mwingilo wa kuuba byobya ne.

<sup>65</sup> Kimye Lesa kyo apele mwanamulume wa mukazhi, Aye wa mupele kintu kyakila kuwama Kyoakonsha kumupa, pangye ya lupulukilo. Bino inge umo waeseka kutola kifulo kya mwanamulume, akye ke kintu kyakila bingi mukutama kyo akonsha kutola. Bino, abyoye. Mwamona?

Pano twakonsha kumona byo kingila ku mupashi.

<sup>66</sup> Na—Nayuka mba akyo kyatama, walanguluka mba kyatama, bino kya Bukine. Atweba kechi twatako muchima musango mo kyatamina ne, twafwainwa kukumanya bishika. Abyo Baibolo byo afunjisha. Mwamona?

<sup>67</sup> Pano, papo twamona patoka mutanchi wa bumupashi, wanengezha Lesa wa Muzhi Wanji wa kulutwe na Musongwa Wanji wakulutwe, ubena kumwekanyika pakino kimye.

<sup>68</sup> Inge mwanamulume wasongola inetu mulalelale, mwakonsha kumona kyo abena kukeba kulutwe. Inge mwanamulume wasongola mwanamukazhi ukabulanga kwikala pa nzubo, mwakonsha kumona kyo abena kukeba kulutwe. Kabiji Amiwa kimye kimo . . .

<sup>69</sup> Akye kyumvwanika kutama. Amiwa naumvwa kwikyamba. Kabiji Ami—Amiwa, javula, inge Naumvwa kwamba kintu, Nafwainwa kwikyamba. Kabiji javula jo jishinda jakwa Lesa.

<sup>70</sup> Amiwa—Amiwa nayanga na kalama wa banyama ye Naingilanga naji, kupota bang'ombe. Kabiji Namwenenga mukulumpe mulongo kimye kyonse kutala mu meso a yewa mwana ng'ombe mulume kasa akyangye kwipuzha mutengo ne. Kabiji wafumyako mutwe wanji, kabiji wabwela wamutalatala. Amiwa namulondejilengatu, kasa namumonatu. Kabiji wamutala peulu ne panshi, inge ubena kumweketu bulongo, kipimo kya kimino. Kabiji wabwela wamutala mu kilungi kyanji, kabiji kimye kimo wakonsha kupukunya mutwe wanji wabwela wafumako.

Naambile mba, “Jeff, Nasaka kukwipuzhako kintu kimo.”

Aye waambile mba, “Ambanga, Bill.”

<sup>71</sup> Kabiji Naambile mba, “Kika kyo utajila ng’ombe mukilungi kimye kyonse?” Naambile namba, “Aye ubena kumwekatu bulongo, wawama—wawama ng’ombe ne kunema.”

<sup>72</sup> Waambile mba, “Nasaka kukubula, mulunda, uji na byavula bya kufunda.” Kabiji Amiwa—Amiwa navulukile byo ambujiletu. Waambile mba, “Amiwa kechi natako muchima musango ye alengelwamo ne. Wakonsha kwikala na nyama, kufikatu ne kumukono. Bino inge uji nayewa musango wa bumungye mu kilungi kyanji, kechi mwakonsha kumupota ne.”

Naambile mba, “Kika kyo kyaikela byobyoy, Jeff?”

<sup>73</sup> “Kyawama,” waambile mba, “kintu kitanshi,” amba, “kechi ukekala pamo ne.” Kabiji waambile mba, “Kyalondelapo ke kino, kechi ukamushanga bana ne.” Kabiji waambile mba, “Bamubika mu kipaka pakino kimye kyokyo abaila. Umvwe mwamukasulula, nayewa musango wa bumungye, wakonsha kunyema bingi wi yipaya ne kwiyipaya.”

<sup>74</sup> Naambile mba, “Mwayuka, Amiwa nafundapo kintu kimo. Naketekela mba akya kingila ne ku banabakazhi, ne apo.” Ibyo. Ibyo.

<sup>75</sup> Awa musango wa mungye, wakutalang’ana kyakosa, mwekelo yangovu, kyawama kubula kukwatako, mulunda, byonse bya kifufya peulu ya meso anji. Kabiji Amiwa kechi . . . Amiwa kuuba nakeba kyokyo ne. Amiwa kechi nayuka mba akyo kyafikilamo ku Mwinakilishitu ne. Amiwa kechi natako muchima nangwa televizhonyi ne mapepala bambe mba walamba ne. Ke mwekelo-yatama bingi, mwekelo ileta moyo ayo yo Nabula kumonapo mu bumi bwami.

<sup>76</sup> Kimye kitanshi Amiwa kya kumonapo kyokya, kuno ku Nzubo ya majila ya kwa Clifton, lukeelo lumo, pa kajo ka kwiaula. . . Namwene bamo bainetu banyike baishile. Mulongo Arganbright po atweleletu mukachi, ne Amiwa. Kabiji wakukulukile panshi. Kabiji Amiwa nantajile, kabiji ne yewa nsongwakazhi watwelele. Nalangulukile mba, “Kyawama, Ami—Ami—Ami—Amiwa kechi nayuka ne.” Amiwa kechi nakikimonapo kala ne. Kyajinga nobe kintu kimo. Oo, wamwekelenga nobe kilongolo, mwayukatu, ke mwekelo imwsha-kusekesha. Amiwa—Amiwa kechi mbena kwamba byobyoy pakuuba mba sekesho ne, Amiwa—Amiwa mbena kwikyamba ku. . . Mwayukatu, Amiwa namona kikola kya mbumba, Amiwa ne mishonale, Amiwa, namona misango yonse ya ngubilo yakosa, mwayukatu, ya. . . bikola, kabiji Nailenga ku inetu wakyanyike namba na mubuule, “Amiwa—Amiwa—Amiwa ne wamwingilo, Amiwa—Amiwa ndombelela bakolwa. Wakonsha—wakonsha kutemwa amiwa na kulombelela nyi?” Kabiji kechi Nakimonapo kintu kiji byobya ne. Kabiji ponkapo,

kwatwelele babiji nangwa bakwabo basatu, mukachi. Naubile nobe nabwela panyuma ne kupembelelako.

<sup>77</sup> Kabiji Mulongo Arganbright waishile, nanchi Naambile mba, “Mulongo Arganbright?” Aye kape uji muno. Naambile mba, “Ng’anyi lukatazho luji na yewa mwanamukazhi?” Mwamona?

Kabiji waambile mba, “Awa, ke pechi.”

<sup>78</sup> Naambile mba, “Kyawama, ami, ami!” Mwamona? Amiwa nalangulukile mba bafwainwa kumubika mu nzubo ya bilongolo kuntu kumo, mwayukatu, kukanya mba kechi kikumbane ku banabakazhi bakwabo ne.

<sup>79</sup> Bino, mwayukatu, wafwainwa kutachika bintu, watala, walomba, inge ubena kusalulula. Mambo, tumona, mu kikyeye, Kyambo kyamulaye. Awa, musongwa mwanamulume ye akonsha kusala, ukamweshwa byubilo byanji. Kimweshatu biji mwi aye.

<sup>80</sup> Pano, mwakonsha kulanguluka mwanamulume, wayulwamo na Mupashi Wazhila, watola kintu kiji byobya kwikala mukazhi? Amiwa—Amiwa—Amiwa kechi ne kimona ne, mulongo. Pano, kapepo Amiwa ne kyelatu kyo bengijisha. Bino, mwayukatu, Amiwa—Amiwa kechi nakonsha kukwatakanya kyokyo ne, mwamona, monai, mambo kikamweshwa biji mwi aye. Aye ukamukwasha kulenga nzubo yanji ya kulutwe.

<sup>81</sup> Pano, nanchi, inge twabwela pa kimye kicheche, ku lubaji lwa bumupashi. Kabiji umvwe mwamona kipwilo kiji mu ntanda, byubilo bya muntanda, kulanguluka bya muntanda, kutola lubaji lwa muntanda, kubala Mikambizho ya Lesa nobe Aye kechi ye wi Inembele ne, nanchi anweba—anweba langulukaitu mba Kilishitu kechi wakonsha kutola Musongwa uji byobya ne. Mwakonsha kulanguluka kusenda kipwilo kyakataataka kya leelo kwikala ke Musongwa? Kechi Nkambo yami ne. Amiwa kechi. . . Amiwa kechi ne kimona nangwa pachechetu ne. Ine. Vulukai, pano, mwanamulume ne mukazhanji abo ke umotu. Bushe wakonsha kwininga obewa mwine ku muntu uji byobya? Inge obewa wakonsha, kyakonsha kine kuleta bumvu ku lwitabilo lwami mwi obewa.

<sup>82</sup> Kabiji, pano, ibyepi Lesa kunungakana Aye mwine ku kintu kiji byobya, pite wa kimye kyonse wa budinominesheni? Anweba mulanguluka mba Aye wakonsha kwikyuba, “Kwikala na musango wa bwina lesa bino saka bakana bulume bwao?” Aye kechi wakonsha kwikyuba ne. Aye wafwainwa kwikala na byubilo Byanji mwi aye. Kya kine, kyakishika, Kipwilo kyasemwa-jibiji kyafwainwa kwikala na byubilo byajinga mwi Kilishitu, mambo mulume ne mukazhi ke umotu. Kabiji inge Yesu waubiletu byonka byatokeshe Lesa pa muchima, walamine Kyambo Kyanji kabiji wamwesheshe Kyambo Kyanji, Musongwa Wanji ukekala wa byubilo bimotu. Aye kechi wakonsha, nangwa pachechetu, kwikala dinominesheni ne. Mambo, nanchi, nangwa

wakonsha kwamba byepi amba, “ine,” aye utangijilwa na kije kuntu kumo, akyo kimubuula byakuuba kabiji ne byo akonsha kubuula kuuba, kabiji, bimye byavula, mamilyoni avula kufuma ku Kyambo kyakine.

<sup>83</sup> Kyatama bingi kyo twafuma ku mwine Ntangi ao Lesa ye anshile mba ye wakatangijila Kipwilo. Aye kechi watumine mukulumpe wa pa kambi ne. Aye kechi watumine ma bishopu, makandino, mapulisiti, bapapa ne. Aye watumine Mupashi Wazhila ku Kipwilo, mu kutangijila Kipwilo. “Umvwe Aye Mupashi Wazhila waiya, Aye ukemutangijila mu Bukine bonse, ukasolola bibye bintu kwi anweba, byo Nemubuula, ukemuvululako, kabiji ukemumweshwa bintu byonse bikeya.” Aye Mupashi Wazhila ye wafwainwa kuuba kyokyo. Pano, kipwilo kyakatataka kyashikwa Byobyoy. Abo kechi Bikitemwa ne, nanchi wakonsha kwikala Musongwa wa Kilishitu byepi? Bantu baleelo babena kusalulula dinominesheni wakatataka. Byo kyuuba, kimweshatu kubula kumvwisha Kyambo.

<sup>84</sup> Amiwa kechi natazha mu kwi mukozha ne, bino Natazha mu kuuba mba kitwele palepa poso mwatalako.

<sup>85</sup> Amiwa nasongweshwa bantu bavula, bino kimye kyonse kivulula Kilishitu ne Musongwa Wanji. Masongola amo o Nasongwesheshe kuno, bimye byapita kunyuma, kyajinga—kyajinga kintu kyakila bingi kuwama mu bumi bwami. Papita myaka yavula kunyuma, kimye kyo Najingatu musapwishi mwanyike.

<sup>86</sup> Mulongo wami waingijilenga ku—ku PWA. Amiwa kechi nayuka ne kana muntu umo ukivuluka kyokyo, ne pano, nangwa ine, muntu yense wakoma kufika pa kipimo kyami. Kabiji awa wajinga—mwingilo kafulumende ye ajinganaji. Kabiji mulongo wami waingilanga konka, pepi nobe sate mailoshi. Bapoilenga bizhiba, mwingilo wa bakulamawizha bilengwa nalesa.

<sup>87</sup> Kabiji kwajinga nsongwalume waingilanga konka, ne aye, wafumine ku Indianapolis, pepi nobe, oo, pepi nobe aduleendi mailoshi kulutwe ya Jeffersonville Amiwa—Amiwa nkongikala, nangwa nkonaikalanga. Kabiji kwajinga. . . Aye waambile ku mulongo wami, juba jimo, waambile mba, “Doko,” waambile mba, “Na—Nasaka. . . Amiwa mbena kusaka kusongola, inge Najinga na mali avula akulipila musapwishi.” Aye waambile mba, “Amiwa—Amiwa njina mali afikilamo akutambwila kitupa, bino,” waambile mba, “Amiwa kechi njina na mali afikilamo akupana ku musapwishi ne.”

<sup>88</sup> Doko waambile mba, “Kyawama, mulongo wami musapwishi, kabiji—kabiji aye—aye wakonsha ku kusongweshwa.” Aye waambile mba, “Aye kechi ulipilisha bantu pa bintu bya musango yewo ne.”

Aye waambile mba, “Mwakonsha ku mwipuzha kana wakonsha kusongweshwa nyi?”

<sup>89</sup> Kyawama, abwa bufuku mulongo wami wangipwizhe. Naambile mba, “Inge kechi wakisongolapo kala ne, umo wa mwiabo, kabiji abo . . . bintu byonse bijitu bulongo.”

Aye waambile mba, “Kyawama, ee, Amiwa nsakumwipuzha.”

Kabiji Naambile mba, “Inge byokiji, mubuulai mba, akeye kuno.”

<sup>90</sup> Nanchi, Kibelushi byo kyafikile nsongwalume waishile. Kyajinga kintu kikatampe bingi kwi amiwa, kimye kyonse ntala ku kikye. Nakonsha . . . Mabaanga amvula, kabiji wajinga na motoka wakala Chevrolet, na malaiti obakasa na mawaya, waendeshe kwiya, kulutwe yami. Kimye kichechetu kufuma pafwijile Bakazhi bami, kabiji natupikilenga kikamba, malumu abiji a acheche. Kabiji—kabiji Doko wajinga konka ne amiwa, na kwibapembelela.

<sup>91</sup> Kabiji—kabiji nsongwalume walupukile mu motoka, kabiji kine kechi wamwekelenga nobe musongoshi, kwi amiwa, nangwatu ku muntu uji yense ne, Nalanguluka. Ee. Nakonsha kupota sapato yawama bingi, ya dola umo ne afu. Kabiji wajinga nayo, ya onaika. Kabiji toloshi kechi wajinga wafika bulongo ne. Kabiji aye wajinga na jaketi wakala wa boyaboya. Amiwa naketekela mba bamo ba mwi anweba bantu bakala mwakonsha kuvuluka. Wamwekele nobe wapita mu mashinyi uwasha kwakubula kumwanyika, kabiji wajinga uji na matomya tomya, bamukasa *bibye*, kabiji wakilang’anya.

<sup>92</sup> Kabiji ne—ne inetu mucheche walupukile ku lubaji lukwabo, wajinga na icheche, oo, ndeleshi iji-namabokoshi.

<sup>93</sup> Amiwa kechi nayuka ne. Naubile kilubo kya kutela byobya bipe, kimye kimo. Kivwalo kyaswala, Naketekela byo kitelwa. Kabiji nanchi kyajinga . . . [Kipwilo kyaseka—Waku.] Nakulubakanya kwikyamba ne jikwabo. Amiwa—Amiwa kimye kyonse nekyuba. Kabiji Naambile mba . . .

<sup>94</sup> Mwanamukazhi wafumine mu motoka, kabiji bakanjijile pa masitepusi. Kabiji—kabiji byo batwelele mukachi, awa kamulanda mucheche, wa . . . Naketekela, aye, pa byonse byo amvwajile wajinga na siketi. Kabiji kechi wajinga na sapato ne, nangwa pacheche ne, ya kumvwala. Aye waendele k yatutu kufuma ku Indianapolis, ne kufika. Wajinga na suki icheche yafika mushi, kunyuma, yalepa, iji nobe beichika kubwela kunyuma. Wamwekelenga bwanyike bingi.

Kabiji Naambile kwi aye namba, “Obewa wakoma bulongo kyakuuba mba wakonsha kusongolwa nyi?”

<sup>95</sup> Aye waambile mba, “Ee, mwane.” Kabiji waambile mba, “Amiwa njina kipepala kyanembwapo nkuswisha bataata ne bamaama.” Aye waambile mba, “Nekimwesheshe ku—ku kije kya mambo kuno, pa kuuba mba ntambule kitupa kyami.”



96 Naambile mba, “Kijitu bulongo.” Naambile mba, “Nasaka kwisamba nenu pacheche kasa tukyanye kufikizha ao masongola.” Baikajile panshi. Awa nsongwalume watwajijiletu na kukeketa mwaya lumu; aye wakebeshenga bingi kutenda suki. Kabiji watwajijiletu na kukeketa mwaya lumu. Aye kechi watelekelenga kwi amiwa ne. Naambile mba, “Mwaana, Nakeba namba obewa uteleke ku byo Mbena kwamba.”

Waambile mba, “Ee, mwane.”

Kabiji Naambile mba, “Wamutemwa yuwe nsongwakazhi nyi?”

Aye waambile mba, “Ee, mwane. Amiwa byo kiji.”

Naambile mba, “Wamutemwa nyi?”

“Ee, mwane. Amiwa byo kiji.”

97 Naambile mba, “Pano, uji na mpuzha kwakumutwala panyuma ya kusongola?”

Waambile mba, “Ee, mwane.”

98 Naambile mba, “Kijitu bulongo. Pano,” Naambile mba, “Nasaka ku kwimpuzhapo kintu kimo. Nayuka namba, obewa ubena kwingila kokwa ku PWA.”

Kabiji aye waambile mba, “Ee, mwane.” Akyo ke pepi nobe madola twelufu pa mulungu umo.

Naambile mba, “Obewa walanguluka mba wakonsha ku musunga?”

Aye waambile mba, “Amiwa nkoba kyonse kyo Nakonsha kuuba.”

99 Kabiji Naambile mba, “Kyawama, akyo kijitu bulongo.” Kabiji Naambile mba, “Pano, ibyepi inge wafuma. . . Byepi inge waleka iye kinto, nyenga? Kika kyo ukoba, ukanyemena ku nzubo, ku bamaama, ne bataata?”

Aye waambile mba, “Ine, mwane. Amiwa kekala nanji.”

100 Kabiji Naambile mba, “Byepi, mwane, inge waikala na basatu nangwa baana foolo, kwabula byakwibajisha, kabiji mwaikala kwakubula kinto. Kika kyo ukoba obewa, ukamukana nyi?”

101 Waambile mba, “Ine, mwane. Amiwa katwajijila kuya kulutwe. Tukeyyuba, mu musango umo.”

102 Naumvwine kukepelwa. Kabiji Namwene kuuba mba kine wamutemwa bingi, kabiji betemenwe abo bene. Amiwa ne basongweshe.

103 Pano Amiwa nakuminye nkoamutwajile. Mooba acheche, Naipwizhe mulongo wami, Doko, nkobaji. Aye waambile mba, “Yanga ku New Albany,” muzhi mucheche kunyuma yetu.

104 Kabiji konka ku mukola, Nkonajinga na kikopo, Nkonayanga pa juba pa juba Amiwa—Amiwa najinga

ulondaizha tambo ya malaiti. Nanchi inge balunda babena kukokoloka, bonse baikalanga, kasa baamba bisela ne bintutu bikwabo, Amiwa natwelanga mu kimbayamba ne kuya ku mukola na kulomba mu kyokya kimye, konka kwa, ne kutanga Baibolo wami, mushi ya kyela kikatampe ponka paikalanga mukinyi wa kyela kya kapotwe. Kwajinga mulumba wa matolokoshi akala ikele konka kwa.

<sup>105</sup> Kabiji yuwe mulunda waile konka kwa na kutolako kitolokoshi ne kubikamo kizhilo. Kabiji watolele bipepala bya majashi a byambo ne kubikapo byakulamikila.

<sup>106</sup> Baanga bayuka taki bbatani kyo kika? Kechi mujipo mwina Kentucky muno ne, nanchi. Ke, kutola kibese kya kipabi kya mapulanga, ne kubikamo byakupopela, ne shipilinga mucheche. Kabiji ne kwikibika mu . . . Akya ye taki bbatani.

<sup>107</sup> Nanchi, be kibikile ponse ponse. Kabiji waile konkwa kuji mukinyi wa byela bya kapotwe ne kumutambwilapo bimo, ne kumulengela ntampulo, yakufika peulu. Kabiji watola bibokoshi byakala, kabiji babika tebulu. Kabiji Nalangulukile mba, juba jimo, “Amiwa nkaya konka na kumona byo babena kwikala.”

<sup>108</sup> Pepi nobe bang’ondo sikisi akye kasa kikyangye kubiwa, Nasongweshe mwana wamukazhi wa ba E. V. Knight ku mwana wamulume wa ba E. T. Slider. E. V. Knight, ke umu muntu wanoka bingi uji kokwa ku Mukola wa Ohio, kabiji, oo, baji na mikinyi yabaya bingi kokwa, ya kulenga manzubo a mapulanga, ne bikwobotu. Kabiji—kabiji Slider, E.T. Slider, uji na kapanyi wa busenga ne mabwe aacheche, baana ba mamilyoneya. Kabiji Amiwa ne basongweshe.

<sup>109</sup> Kabiji Nabwelele kokwa ku mpuzha, kwajinga kupitulukamo pa milungu ibiji, kabiji kubwela kunyuma mu ka nzubo ne kufukamina ku mpilo. Kabiji bwitote bonse ne bintu byonse byo Napichilemo, pepi nobe, napichilemo, pakuuba mba ne basongweshe! Kabiji byo balupukile, kika, bajinga na . . . Abo bantu bakwabo baimene byobya mu kalumu kakala mwajinga mupando mukatampe ne mwaanya wa kuvunga, bino bonse babiji basongwelwe na kusekelela kumo.

<sup>110</sup> Kabiji pano, juba jimo, Nalangulukile mba Nafwainwa kuya na kupepula baabo banoshi. Abo kechi baingilanga ne, bashabo bajinga bamamilyoni, bebashimikijile nzubo yawama. Kwamba kishika, awe E.V. Knight, kokwa, akwa ku katumba, byakushikwilako bizhilo byajinga na kinemenezhi fotiini kya golonde, nanchi mwakonsha kulangulukuka musango ka wa nzubo yo baikalangamo. Abo kechi baingilanga ne. Bajinga na Motoka wawama ye bebapanga pa mwaka pa mwaka. Kabiji bino, bajingatu baana, kabiji bajinga na byonse byo bakebanga. Byo Nafikile juba jimo . . .

<sup>111</sup> Pano, byo Naishile kwiyuka nabo, umu mulunda nabo wajinga mulunda nami wawama bingi. Atweba twakailanga

pamo. Kabiji abyo byo Naishile kwibayuka, byo bankebele mba ne basongweshe.

112 Nanchi Naile na kwibapepula. Nalupukile kufuma mu Ford wami wakala, pangye, kabiji nakajijile pa masitepusi. Kabiji—kabiji Nafikile pepi, ne kwibomvwa Amiwa nebomvwine. Kabiji batobokelenga. Bajinga na mukao umo ne mukwabo. Abo bajinga kumazha. Wajinga nsongwakazhi walamba bingi. Kabiji wajinga umo wa bainetu balamba bingi. Aye watambwile bilambu byavula bingi kokwa, kabiji watambwile kilambu kya myotoka ne bintu bikwabo, mambotu akwicala inetu walamba bingi. Kabiji Natajile pe abo, kabiji umo waikele mu koono imo ne mukwabo ku kwabo, kasa babena kwamba pa nsongwalume umo wazhiile nanji, nangwa nsongwakazhi umo, kiji byonkabyo.

113 Byo Nafikile, bakilukile bingi lubilo kabiji ne kwikwata abo bene na bene kasa baji panshi, na—na maboko abo, kasa baji panshi, baishilenga kasa benda kwiya ku kibelo. Baambile mba, “Kika, alo, Mulongo Branham! Uji byepi?”

Naambile mba, “Jitu bulongo. Muji byepi anweba?”

114 Kabiji, “Oo,” waambile mba, “Na—Na...Tunji bingi nalusekelo. Kechi ibyo nenyi, mutemwe?”

Kabiji waambile mba, “Ee, mutemwe.” Mwamona?

115 Pano, mwamona, ubena kubikapo kintu kyabula kyakine ne. Pano, obewa kechi wakonsha kukaba na mujilo wakupeta ne, nobe bimo bya bibye bipwilo bibena kupeta pentekositi, na kintu kyaubiwe myaka sauzande umo nangwa myaka masauzande abiji apita. Obewa kechi wakonsha kukaba na mujilo ye bapeta ne. Pentekositi ukijitu wakine leelo byonka byo ajinga mukyokya kimye. Mwamona? Ee. Awa Mujilo ubena kupona ne kino kimye. Kechi mujilo wakupeta ne. Ke Mujilo wa kine.

116 Nanchi, abo, byo bajinga. Mwamona? Amiwa—Amiwa kechi nakonsha kukeba kwikala yewa musango ne.

117 “Oo,” Nalangulukile mba, “mwayuka, akwa ku jibwe ne kuyewa mu mukola, kokwajinga bamasongola akwabo.” Amiwa nalangulukile mba, “Pakibelushi Kimo mabaanga Amiwa kapichilako kokwa kamone byo babena kwikala.”

118 Nanchi Amiwa, ndochi pa kilungi, kabiji ne ofoloshi wandochi, najinga na byela byami. Nalangulukile mba, “Amiwa nsakupichilako kwi abo.” Amiwa napichijileko kimweke nobe Mbena kumona mawaya atabuka na mvula nangwa na kintutu kikwabo, kabiji byo Naendelenga na kulondaizha mawaya a telefoni, mawaya a malaiti mwaya mukola. Kabiji awa Chevrolet wakala, waikele byobya kulutwe. Pepi nobe mwaka umo palutwe, panyuma ya kwi basongweshwa. Kabiji kwajinga ki—ki... Kizhilo kyajinga kya kyashi, kabiji Nakonsheshe kwi bomvwa kasa baamba. Nanchi akye kyaumvanyika nobe kafutufutu, bino Naendeleko pepi bingi kya kuuba mba

Nakonsha kuteleka, ne kumona bya aambiwenga. Naimene popa. Kabiji Nakebeletu kuyuka, amiwa mwine.

<sup>119</sup> Amiwa nkeba kutana bishika pakuuba mba Nayuka kyo Mbena kwambapo. Abyo Amiwa byonguba na Kyambo kya Lesa. Bushe Akye kya Bukine, nangwa Akye kechi kya Bukine ne? Aye Wakonsha kulama Kyambo Kyanji, nangwa Aye kechi wakonsha kulama Kyambo Kyanji ne? Aye inge kechi ulama Kyambo Kyanji ne, nanchi Aye kechi ye Lesa ne. Mwamona? Aye inge ulama Kyambo Kyanji, Aye ye Lesa. Mwamona?

<sup>120</sup> Kabiji nanchi Amiwa nakebelenga kumona byobekala. Kabiji Napichijile kulubaji, bukiji bukiji. Namumvwine kwamba mba, “Oo, mutemwe, Nakebelenga kukupotela kyokya, nakebeshe bingi.”

<sup>121</sup> Aye waambile mba, “Pano, tala, mutemwe.” Aye waambile mba, “Ino ndeleshi ijitu bulongo.” Aye waambile mba, “Kika, ino ijitu bulongo.” Waambile mba, “Nasata pa kyokyo. Bino wamona . . .”

<sup>122</sup> Amiwa nafwenyenye kwipi, kyakuuba mba Nakonsha kumona mu kipeze, kya kizhilo po kya tabuka amwa mu kitelokoshi kya kikochikala. Kabiji wajinga byobya, waikela byobya, kabiji naye waikela pa kijoma kyanji; ne maboko anji a mukumbata, kabiji naji wa mukumbata. Kabiji wajinga na musango wa kisonchi kyanekena kyabaya, kabiji kyajinga na jiso jicheche, kyafokoka kunshi, ne peulu, kabiji walupwile kipepala kyanji kya kufolelapo, mu kyokya. Aye—aye wikutujile pa tebulu. Waambile mba, “*Mukananga* bya pa nzubo. *Mukananga* musonko wabukikizhi. Kabiji *mukananga* ku motoka.” Kabiji kechi bakonsheshe kupwisha bya kukabila byabo ne. Naishile kutana mba, aye wamwene ndeleshi icheche pa windo, kabiji wiimwenenga pa milungu isatu, ayo ipotwa dola umo ne tubaanapo. Aye wakebelenga kwi ipota. Waambile mba, “Kyawama, mutemwe, wakonsha kumweka bingi bulongo na yoya.” Kabiji aye waambile mba . . .

<sup>123</sup> Aye waambile mba, “Bino, mutemwe, Amiwa—Amiwa njina ndeleshi. Ami—Amiwa kechi mbena kwi ikabila ne.” Mwamona? Kabiji awa ina mfumu mucheche . . .

<sup>124</sup> Kabiji Nafumineko, ne kutala peulu. Nakonsheshe kumona awa—awa mukungu peulu ya nzubo ikwabo. Naimene popa ne nkukeketa, maminetitu acheche. Nalangulukile mba, “Ing’anyi muntu munoshi?” Nalangulukile mba, “Inge, Bill Branham, inge ubena kukeba kusendapo kifulo kimo, kwepi ko wakonsha kuya?” Mambo ami, Amiwa kechi nakonsha kutola akya kintu kyawama peulu ya katumbatumba ne. Amiwa nakonsha kutola byobya byubilo munshi, byo bilenga bwikalalo, muntu umo watemwa kabiji wikala ne amiwa, ke muntu weseka kulenga bwikalalo; kabiji kechi ku kuletelela bintu byonse ne, mambo a bintu byawama; kabiji muntu uji ne obewa, ke lubaji lobe.

125 Ao kimye kyonse wikala ne amiwa, byonka byo kyajinga. Umo wasajile nsongwakazhi walamba, mukwabo wasajile byubilo. Pano, ajo jojishindatu jimo jo wakonsha kusalulula. Kitanshi, talai pa byubilo; kabiji kikwabo, inge wamutemwa, kyawama.

126 Monai, Adama mutashi wakwa Lesa kechi wajinga na kyakusala ne, namambo a mukazhanji. Aye kechi wajinga na kyakusala ne. Lesa wamulengejiletu umo, kabiji aye kechi wamusajile. Nanchi twatana kuuba mba wamutwajile mungi kufuma ku Kyambo kya Lesa. Aye kechi walombejilepo pa kyokya ne. Aye—aye—aye kechi uji pamo ne anweba ne Amiwa ne. Aye kechi wajinga na kya kusala ne. Kabiji ne jikwabo, pa kuuba kyokyo, wamutangijile kufuma ku kifulo kyanji kya kwikala mwaana wakwa Lesa. Kabiji mukazhi wikyubile ponka pa ku mumwesa musango wangikelo yakatataka, kintu kyo babujile kukonsha kuuba ne. Pakuuba byubilo byanji byamwesheshe mba waile mungi. Nkebelo yanji ne mimiko byajinga byatama. Kabiji wa mukajikizhe, kupichila mu milanguluko yanji, na mambo a kyokya kyeya kipy kyoataine, kyajinga kyapusanako na Kyambo kya Lesa, ke jishinda jawama ja kwikelamo bwikalo.

127 Kabiji baanga banabakazhi leelo, kabiji ne kulubaji lukwabo, banabalume, bakonsha kufumya mwanamukazhi kwi Lesa, nangwa kufumya mwanamulume wawama kwi Lesa, na kweseka ku mubuula mba, “Abwe mupopweshi, anweba bansongwalume ba ki Pentekosito, abwa bupopweshi,” baamba mba, “oo, awa ke musango-wakala, ke kafwa wakala, kechi mwakonsha kuketekela kyokyo ne.” Obewa wafwainwa kulomba kyabaya bingi saka ukyangye kusongola yewa nsongwakazhi ne, Amiwa kechi nasakamana nangwa ekale walamba ne. Pamotu ne ku mwanamulume.

128 Aye wa mukajikizhe kufuma mu kyaswa muchima wa Lesa ne ku mulengela wauba kintu kyo akonsha kubula kuuba ne, kabiji, ku kikye, kyaletete lufu ku mutundu wa muntu yense. Ao oene mambo Baibolo kyo a mukainya kufunjisha, nagwa kusapwila, nangwa kukwata Kyambo kya Lesa, mu musango uji yense.

129 Nayuka mba, banyenga, anweba bavula mwamba mba, “Aye Nkambo wangichile kusapwila.”

130 Amiwa kechi nsakupachika nenu ne. Bino Amiwa mbena kwi mubuula mba, Kyambo kyaamba mba kechi wakonsha kwikyuba ne. “Aye kechi wakonsha kufunjisha ne, nangwa kwikala na bukulumpe ne, kana kwikala bazhindama.”

“Kyawama,” waamba mba, “aye Nkambo wambujile mba ne kyube.”

131 Amiwa kechi nashinauka kyokyo nangwa pachechetu ne. Bushe mwaumwine Mbila yami bufuku bukwabo pe Balamu?

Balamu watambwile patanshi, kwaoloka-kufukula kwa Lesa, “Mba kechi wikyube ne.” Bino aye watwajijiletu na kukosamika poso mu kupezhako wamwambijile mba yanga ukeyyube.

<sup>132</sup> Lesa wakonsha ku kuswisha kusapwila. Amiwa kechi naamba mba Aye kechi wakuswisha ne. Pakuuba kechi kiji mwayila mutanchi Wanji mutanshi ne. “Mambo aye wafwainwa kwikala wanekenena, monka mwaambila ne mizhilo.” Kya kine. Onkao mambo, kechi wafwainwa kwikyuba ne.

<sup>133</sup> Pano, monai ne jikwabo musongwa wa ku mubiji byoanji kipasha kya musongwa wabu mupashi. Akyo Kyambo kyaamba, mba, “Aye walengejilwe mwanamulume, kabiji kechi mwanamulume walengejilwe aye ne.”

<sup>134</sup> Pano Mbena kwamba, kabiji kika, mu mamineti acheche, pa Musongwa wa Kilishitu, bino Mbena kukeba kwi mumwisha kintendekesho kya kikyeye.

<sup>135</sup> “Mwanamukazhi walengejilwe mwanamulume, kabiji kechi mwanamulume kwikala wa mwanamukazhi ne.” Ao oene mambo, mu mizhilo yakala, kusongola mpaji kyaswishiwe. Talai pe Davida waikela na bakazhi faivi aduleendi, kabiji Baibolo waamba mba, “Aye wajinga muntu wa mwaila muchima wakwa Lesa.” Kasa aji na banabakazhi faivi aduleendi, kabiji Solomoni na banabakazhi wanu sauzande, bino kafwako nangwa umo wa booba banabakazhi wakonsha kwikala na mwanamulume mukwabo ne.

<sup>136</sup> Anweba tambulai tepu wami wa pa *Masongola Ne Kwikana*. Amba, apa peulu ya mutumba ku Tucson, kuno kechi papita kimye kyabaya ne, Najinga kokwa nakulombapo. Masukuulu aimikilwe, pakuuba mba batambe awa Mumbulungwa wa Mujilo wazhokolokelenga mutumba kabiji ne kulupuka, kunyuma ne kulutwe, peulu ne panshi. Bantu baji kuno bekiyuka kyokyo, akwa, kabiji be Kimwene; kabiji Kya. . . byo Ambujile Bukine bwa mepuzho a masongola ne kwikana. Inge kuji lubaji lumo lubena *kuya* bibye, kabiji lumo lubena *kuya* byobya, kwafwainwa kwikala Bukine kuntu kumo. Panyuma ya totwa Tutetesho Tutanu na tubiji, Aye wamwesheshe Bukine pa kikyeye.

<sup>137</sup> Monai, pano, mwanamukazhi wafwainwa kwikalatu na mulume umo, mambo, “Mwanamukazhi walengejilwe mwanamulume, kabiji kechi mwanamulume kulengelwa mwanamukazhi ne.” Aba bonse banabakazhi faivi aduleendi bajinga mukazhi wa kwa Davida, kabiji kyajinga kipasha. Inge Kilishitu waikala pa Jitanda mu Myaka kiumbi kimo, Musongwa Wanji kechi ukekala muntu umo ne, pakuuba bakekala makumi jikumi a biumbi, Musongwa, bonse mu Umo. Kabiji Davida wajinga na bakazhi bavula, nobe pa buke buke, bino bonse pamo bajinga mukazhi wanji. Kijitu pamo nobe Mubiji yense wa baitabila ke Musongwa wa Kilishitu, mambo aye Iye,

mwanamukazhi. Aye wajinga Mwanamulume. Pano, atweba twalengelwa Kilishitu. Kilishitu kechi walengejilwe atweba ne.

<sup>138</sup> Abyo ibyo byo tweseka kuuba mu mabuuku etu, tweseka kulenga Kyambo (ao ye Kilishitu) kifikilamo mwi atweba, mukifulo kyakwamba mba atweba tufikilemo mu Kyambo. Alo lo lupusano.

<sup>139</sup> Inge mwanamulume wasala nsongwakazhi kufuma mu kisemi kimo, aye kechi wakonsha kukosela pa kulamba ne, mambo kulamba kujimbaika. Kabiji kulamba, kulamba kwakatataka kwa muntanda, ke kwa diabola.

“Oo,” Mbena kumvwa muntu umo kwamba koko, “mba ikala wajimuka papo, musapwishi!”

<sup>140</sup> Amiwa naamba namba abye bintu pa ino ntanda, byatelwa mba byalamba, kine ke bya kwa diabola. Amiwa nakonsha kwikishinikisha kwi anweba. Nanchi, mwaila kulumbulula yoyo ng’ambilo, twayai tupalanguzhe Kyambo kyazhila kya Lesa, tumone kana kiji bulongo nangwa ine. Kabiji anweba bamo banabakazhi mukeba kwikala balamba! Monai kwepi ko kyafuma. Mu ntendekelo, twatana kuuba mba Satana wajinga walamba bingi poso byo ajimbaikile ba Malaika. Kabiji aye wajinga Malaika wakijile bingi kulamba pa bonse. Kyamwesheshe mba, kiji mwi diabola. Byambo bya maana waamba mba, Solomoni waamba mba, “Buya bo bwatutu.” Abyo ibyo. Bubi bwawama. Kyakine, byo kiji. Abo bukebula.

<sup>141</sup> Nasaka kwi mwipuzha, ne kwamba kintu kimo papo kwi anweba. Nakeba mba anweba mumone, mamineti acheche. Mu byonse bilengwa biji mu ntanda, bang’onyi, banyama, twatana kuuba mba bumi bwa banyama, bonse kufumyakotu muntu, mwanamulume ye walamba, kechi mwanamukazhi ne. Kika kyo kyaikela byobyo? Talai pa ba... Talalai pa diyala, aye—aye walamba kabazhi jikalala uji na masengo, kabiji ne mucheche myule mulume. Talai pa—pa kyaje, pachechetu, kyaje wabalala, kabiji ne wabaya shikombwe wa mayona-awama. Talai pa kang’onyi kalume ne kang’omyi kakazhi. Talai pa jimbata mulume ne wa mukazhi. Mwamona? Kabiji kechi kujipo mutundu umo muntanda ya panshi, ao walengwa, wakonsha kujimbaika kabiji ne kwibwezha panshi nobe mwanamukazhi ne.

<sup>142</sup> Pano, nyenga, kechi wimane ne kufumamo ne. Pembelelaitu poso twaumvwa kufika ne ku mpelo ya Kikye. Mwamona? Mwamona?

<sup>143</sup> Kafwako uji byobyo ne, kafwako inetu wapusana na mwanamukazhi, wakonsha kwikala na byubilo byatama ne. Anweba mutela kabwa mba “pite,” anweba mutela ngulu “mba—mba ngulu mukazhi,” bino, mwaila byubilo, baji na byubilo byawama kukila bavula bajiko bakaya bya mafilimu. Abo kechi

bakonsha kwikalapo musango mukwabo ne kanatu wa byubilo byawama.

144 Kabiji mwanamukazhi iye wapelwe mambo, mambo a kuuba kintu kyapusanako. Abyo ibyo. Monai kwamutwala buya bwanji? Pano, oene mambo, leelo, twatana kuuba mba banabakazhi kulamba kwabo kubena kuyatu palutwe. Inge mwatola Pearl Bryan, mwamonapo kipikichala kyanji nyi? Watongwelwe kwikala walambisha mu America. Kechi kujipo mwana wa sukuulu utanwa ku sukuulu wakosha kubula ku—kumusha kunyuma ne. Bushe mwayuka mba kyafwainwa kwikala muyewa musango nyi? Bushe mwayuka mba Baibolo waamba mba byobyo kikekala nyi?

145 Bushe mwayuka mba kupona muntendekelo kwaishile kupichila mu mwanamukazhi? Kabiji kupona . . . Mpelo ikapwa mu musangotu umo, banabakazhi kwikala mu luusa kabiji ne kutangijila banabalume, ne bintutu bikwabo. Anweba mwayuka mba Kinembelo kyaamba kyokyo nyi? Anweba mwayukatu, aja juba jo akamvwala byakuvwala bya mwanamulume, kabiji watenda ne suki, byonse bye byapusanako na Kyambo kya Lesa. Kabiji mwayuka mba aye wimenako kipwilo? Inge mwamona banabakazhi byo babena kuuba, anweba mukamona kipwilo byo kibena kuuba. Abyo kine ibyo. Pano, bino, akyo kyaikala kya kine pamo byonka byo kyaikala kya kine Kyambo kya Lesa.

146 Kafwako mukazhi mukwabo walengwa wakonsha kwibwezha panshi byonka byakonsha kuuba mwanamukazhi ne. Kabiji nangwa byonkabyo, kupichila mu kyokyo, walengelwe kufuma ku- . . .

147 Aye kechi wajinga mu bilengwa bitanshi kulengwa ne. Byonse bikazhi biji mu bilengwa bitanshi: bang’onyi, kilume ne kikazhi; banyama, mulume ne mukazhi. Pakuuba, mu bantu, Lesa walengeletu mwanamulume, kabiji wamufumishe kwi Aye. Kabiji mwanamukazhi ke kyalengwa—kufuma ku mwanamulume, mambo Lesa kechi waubilepo kintu kiji byo byo ne. Palanguzhai mu Binembelo. Kine ibyo. Lesa, ine, mwane, mu kulenga Kwanji kutanshi ne. Aye kechi wajinga mu byobya ne.

148 Bino inge wakonsha kwilama bulongo aye mwine, uji na fweto ikatampe kukila mwanamulume. Aye wabikwa pa kwesekwa. Kupichila mwi aye lufu byo lwaishile. Aye wazhatwa pa lufu lonse. Pakuuba Lesa wa alulukile ne kwingijisha umo mu kubwezha Bumi jibiji; waleta Mwaana Wanji kupichila mu mwanamukazhi, yenka walukokelo. Pakuuba yenka watama ye—ye wakijisha mukutama; kechi kujipo kintu kikwabo kyakonsha kubwela panshi byobya ne.

149 Kaina, mwaana wakwa Satana, walangulukile mba Lesa waswa buuya. Aye wikyuba ne leelo. Kaina wajinga mwaana wakwa Satana. “Oo, pano!” byo mwaamba byo. Kechi tusakuya mu kuzhika pa kyokyo ne, bino lekaitu ne mupwishishekyo. Aye



Baibolo waamba mba aye “wajinga wa yewa mubi.” Nanchi, akyo kyapwisha byonse. Kijitu bulongo. Bino, aye wajinga mwaana wakwa Satana. Kabiji aye walangulukile mba, kuleta kitapisho ne kwikilenga kyawama kya bupopweshi, amba akyo Lesa kyo akonsha kunemeka.

<sup>150</sup> Abo balanguluka, balangulukatu kintu kimo buleelo. Kyakine. Akye, “Tushimika kishimikwa kikatampe. Tukekala na madinominesheni akatampe. Atweba tukalenga kishimikwa kyabaisha kabiji ne bantu bamvwala-bulongo, basapwishi bafunda bingi.” Kimye kimo Lesa uji teeni milyoni mailoshi kufuma ku kikyeye. Abyo ibyo. Nangwa byonkabyo, ke kipwilo.

<sup>151</sup> Nanchi, inge Lesa unemeka bupopweshi, bukishika, kwipana bukitapisho, Kaina wajinga waoloka nobe byonka biji Abela. Pakuuba kyajinga kya mulumwekesho, kya kuuba wayukile mba kechi kyajinga maapozi basemi banji obajile ne.

<sup>152</sup> Amiwa nsakwambapo kintu kimo papo akyo kibula kumvwanika bulongo ku wa mwingilo ne, bino Amiwa nsakwikyamba, nangwa byonkabyo. Amiwa ng’umvwa bakwabo kasa babena kwamba bintu, nanchi Ami . . .kwamba bisela bicheche, kabiji kechi nekitazha mu kyokyo ne. Naambile kikyeye, nangwa bonkbyo, “Inge kuja maepozi kulengela banabakazhi kuvuluka mba baji mulekese, kyawama twapaana maepozi jibiji.” Mwamona? Mwamona? Uu-uu. Ndekelaiko mambo pa kyokyo, bino byonkabyo pakuuba mba kwikale lupipu. Amiwa ne mukwachijila muno, kabiji mbena kwamba pa banabakazhi, ne bikwabotu. Ami—Ami—Amiwa nasaka namba ne mukokoloshe pa mineti umo, pa kikwabo kibena kulondelapo. Pano, monai, anweba . . . Kechi kyajinga ma epozi ne. Twayuka kyokyo.

<sup>153</sup> Kipwilo kyaikala ano mooba, na bintu byo babena kumwenamo, kijitu pamo nobe byonse bya kumwenamo byalengwa-na muntu, bibena kwaluka ke bya kisayaasi. Abo babena kweseka kulenga kipwilo kya kisayaasi, na bongozhi bwa mapikichala ne mitenge yalepa. Kabiji kyatama bingi ba Pentekosito batwelele mu bibye bintu byatama. Anweba kimuwamina kwikala na kisekeseke, kasa waikala mu koono, ne Mupashi wa Lesa kasa aji pakachi kenu. Pakuuba anweba mubena kwiesakanya pamo na bakwenu bonse, mambo anweba mwaaluka ke dinominesheni. Akyo kyo kyalengejile kikyeye. Mwamona? Bipwilo bibena kweseka kwikala bya kisayaasi.

<sup>154</sup> Kabiji vulukai, monka muntu mo amwena ngyalutwe na sayaasi, aye ubena kwiiipaya aye mwine pajuba pajuba. Byo alengele fundanga, monai byo yauba. Byo alengele motoka, wipaya kukila ne pa fundanga. Pano aye mwine wilengela mbomba walubesha. Nakumya byo akooba na kyokya? Ibyo.

<sup>155</sup> Kabiji ne kipwilo byokiji, byo kyeseka kumwena mu sayaasi, na ntanchikilo yalengwa-na muntu, kibena kukutwala

kwalepa kufuma kwi Lesa, ne kuya mu lufu, kukila ne byo kyajinga pa kimye kitanshi. Abyo ibyo. Kechi wakonsha kusala kipwilo byoka byo waubile na mukazhobe ne. Mwamona? Kyamubijile sayaasi aye ke kyakukumya, pakuuba obewa wafwainwa kufumako ku kipwilo kyobe na mambo a kyokyo; aye walengelele pechi, paunda, kabiji ne bikwabo byonse bye. Salulula na byubilo bya Kyambo Kyanji.

<sup>156</sup> Pano twayai twesakanye musongwa wa ku mubiji leelo na watelwa-mba musongwa wa kipwilo leelo. Esakanyai pamo na mwanamukazhi, ubena kusongolwa leelo.

<sup>157</sup> Pano, anweba talai kyamubila sayaasi. Aye wamweka, patanshi, na suki yanji yatendwa, na musango wa suki ya kwa Jacqueline Kennedy, mwamona, nangwa kintu kimo kiji byoby. Kabiji mwayuka byaamba Baibolo? Aye Baibolo wapana ku mwanamulume, inge wakeba, nsambu ya ku mukana mu masongola, inge wikyuba kyokyo. “Waikala ke mwanamukazhi wabula mushingi, ao wakonsha kutenda suki.” Aye Baibolo byoby aamba. Ibyo. Kechi wayukile kyokyo ne? Uu? Oo, ee! Amiwa nasapwila kyabaya bingi mu California anweba kechi mwakonsha kubula kuyuka kyokyo ne. Abyo ibyo. Oo, ee! Ng’anyi buwame bo kingubila amiwa? Abo bekyuba, nangwa byonkabyo. Obewa kechi wakonsha kutola ngulu ne kumwalula jizhina janji, ku mwalula ke mwanamukoko ne. Monai.

<sup>158</sup> Anweba musakushikwa pa kupwisha kikye, bino musakuyuka Bukine. Mwamona?

<sup>159</sup> Talai. Twayai twesakanye. Uno wiya na pechi yavula bingi, musango wabula wanji, musongwa wakatataka. Omvwai kilungi kyanji, aye wakonsha kumunyema, kapepo. Wakuchinyisha kukeba ne kufwa, fumyaipo pe aye byonse bye bintu. Kabiji nanchi byokiji kipwilo kiji na kyabaya, kyapetwa palutwe yakyo, ke musango wapwijijika wakwa Max Factor wa sukuulu wa mamboawama. Uu-uu. Bonse baji na—na buuya, kilungi kya bubela, buuya bwalengwa-na muntu kabiji kechi buuya bwalengwa-na Lesa ne. Kechi mujipo byubilo byaitabilwa nangwa mu umo ne.

<sup>160</sup> Monai, ujitu pamo nobe Satana, uji nabyavula bya kujimbaika, esekanyai pamo musongwa wakatataka ne aye: bamvwala tuputula, beshinga pechi, batenda suki yabo, bamvwala bya kuvwala bimweka nobe bya banabalume, kabiji bateleka ku kafunga wibabuula mba abya bijitu bulongo. Aye ujimbaika. Aye ukamanyikwa mu kimye kya mantanda akwiulu. Abyo ibyo. Kuuba kyokya na mambotu a kujimbaika, kwikala musango ye abulamo.

<sup>161</sup> Abyo kipwilo byo kyuuba, kitambula abaya ma DD., Ph.D., LL.D. Nanchi mwamba mba, “Kafunga wetu uji *kikye, kyokya*, kabiji ne *kikwabo*,” kapepo kechi bayukapo nangwa kimo pe Lesa kukila Hottentot byo ayuka pa bufuku bwa kina Ijipita

ne. Abyo ibyo. Ibyo. Musangotu umo wa bya kupitamo bya masukuulu a mamboawama kokwa, kabiji kafwapo nangwa kimo kyo ayuka pe Lesa ne kafwako.

<sup>162</sup> Kipwilo kyakatataka na mapechi abo a masukuulu a mamboawama, uuu, baji na banabakazhi babo batenda lukumo lwabo, monka mu wabo ricky ne kafunga ye baji nanji, nobe Yezebeli inge kwajingako umo. Suki yatendwa, tuputula, mapechi, byonse byabikwa na ntompelo ya masukuulu a mamboawama, ajo jo jishinda kipwilo mo jaimena. Ibyo. Pakuuba byubilo byanji bya bumupashi biji kwalepa bingi na byakwikala kalama wa nzubo ao Yesu Kilishitu yo abena kwiya na kutambula.

<sup>163</sup> Inge Mwinakilishitu uji yense wakonsha kusongola mwanamukazhi uji byobya, kimweshatu mba wapona kufuma ku lusa. Ntompelo yanji ya Lesa kabiji ne ntompelo ya nzubo, yafwainwa kwikala nzubo ya musango ka, palepeshatu, inge wasala mwanamukazhi uji byobya. Ine, mwane. Aye kine kechi wakonsha kufikilamo kwikala ntompelo ya Mwinakilishitu ne. Byubilo byanji bya bumupashi biji peene panshi, wafwila, mu buuya bwa dinominesheni kabiji ne lukumbwa lwa muntanda.

<sup>164</sup> Apo kine ipo kipwilo leelo po kyaimena, wapotsha byubilo byanji byapewa na-Kyambo kwi Satana, na bupopweshi bwalengwa-na muntu bwa kisayaasi. Kimye, byo kyajinga na sambu, nobe kipwilo kya kwa Lesa, kyajinga na Kyambo kya Lesa kabiji ne Mupashi Wazhila kasa engila mwi abo, na kulamasha Mubiji pamo na Kyambo kabiji ne na butemwe bwa Lesa. Mukifulo kya byobyoy, wapotsha nsambu yanji ya kusemwa, nobe Isao, kabiji watolako dinominesheni, wa muleka wikyuba ne kwikyuba, kyonse kyo akebelenga kuuba, ibyo, pakuuba mba ekale wayukanyikwa nobe bainanji byo baubile kimye kya Nikeya, Loma. Kyambo kya Lesa!

<sup>165</sup> Oo, kyatwela byepi mu musango wetu waki Pentekosito! Kyatama bingi, bino wikyubile.

<sup>166</sup> Monai, pa mineti umotu, nyenga naani wa ku kipwilo kya Katolika. Awa mwanamukazhi, pakuuba mba ekale ke nyenga naani, wamvwala kitambala kyapelako, aye kine wipanyisha ku kyokya kipwilo. Aye (mweo, mubiji, ne mupashi) ke kipe kya kyokya kipwilo. Aye kechi ujipo na milanguluko yanji ne. Aye kuuba waikala nayo ne, inge wamvwala kyokya kitambala kyapelako, kechi ujipo na milanguluko yanji mwine ne, kechi ujipo na nkebelo yanji ne. Monai papo, Satana wibalenga kwikala bintu byanji byatutu, nobe bya kine.

<sup>167</sup> Akyo Kipwilo kyakine kya Kilishitu, Musongwa, nanji wipanisha kwi Aye kabiji ne ku Kyambo Kyanji kyalailwe, poso milanguluko imo iji mwi Kilishitu yaikala mwi obewa. Lupusano lwabaya bingi!

168 Kabiji twatana leelo, mba, kipwilo kyakatataka, kipwilo kyantanda kyakatataka, kipwilo kyantanda kyakatataka kabiji ne Kipwilo kya bumupashi byonse byaimita, kuuba mba baseme baana.

169 Kimo mwi abyo, kiji na lusemo lwa budinominesheni, byo kikasema, jimo ja . . . juba, ku . . . jimo juba, ku Kije kya Bipwilo bya Ntanda yonse, akyo kikasemena ku ntanda antikilishitu, kupichila mu dinominesheni. Akyo kyakine bo Bukine. Amiwa kape kechi nakonsha kufikako amba ne kimone ne. Naketekela namba Amiwa nkafika. Bino, anweba banyike, vulukai kuuba mba anweba mwaumvwa wa mwingilo waamba kyokyo. Akyo ko kikapelela. Kabiji akyo kyo kiyukilo kya kinyama, inge walenga akya Kije kya Bipwilo bya Ntanda yonse. Kabiji kikasema mwaana, ye antikilishitu.

170 Kikwabo kyaimitwa na Kyambo kya Lesa kabiji kikasema Mubiji, Mubiji wapwijijika wa Yesu Kilishitu, ao ye Musongwa. Aye Mubiji wa Kilishitu kechi wa kipwa ne. Baanga bayuka kyokyo? Mwanamulume ne mwanamukazhi baji umo. Kabiji Kilishitu ke Mubiji umo, Kyambo. Aye Musongwa wafwainwa kwikala yense Mubiji washala. Kabiji aba babiji, pamo, balenga Mubiji umo ne jikwabo. Nobe Adama byo ajinga kuntendekelo: mwanamulume, mukazhanji, ke umo. Pano, Mukazhi, awa Musongwa wakine, wipanyisha bingi kwi Aye, kya kuuba mba kechi wakonsha kwingijisha milanguluko Yanji aye mwine ne. Yanji milanguluko, nangwa byonkabyo, kyo kyaswa muchima Wanji, kabiji kyaswa muchima Wanji kyo Kyambo Kyanji.

171 Pano monai yewa watelwa-mba musongwa wasalwa na muntu, pano esekanyai pamo wa bumupashi na wa bumubiji wa leelo, Yezebeli wakatataka bamulowa kwi Ahaba, na bya buwame byakwa Max Factor, ne bintu byonse. Talai pa kipwilo, musangotu umo, bino ke pite wa Kyambo kyumi kya Lesa; madinominesheni abaya, bishimikwa bikatampe, mali akatampe, mfolelo ikatampe, byonse bipanishiwatu. Banabalume baimana mu pulupiti kasa baswisha mba kijitu bulongo, ne kwibaleka kasa batwajijila nakyu. Ke bujimbijimbitu, kyo kyonka. Kyabukine Nkulo ya Kipwilo kya Laondikeya yampofolwa meso, monka mwaambila Baibolo mba byo kikekala. “Waamba mba, ‘Amiwa ne munoshi. Naikala nobe mfumu wamukazhi. Amiwa kafwako kyo nakajilwa ne.’ Kabiji kechi wayuka mba obewa wi kamulanda ne, muyanji, mpofu, wamanyikwa, uji bwamba: kabiji ne kwi kiyukatu ne.” Inge akyo kechi ABYO BYOBYAAMBWA AYE NKAMBO ne, Lumwekesho 3, Amiwa kechi ne Kitangapo ne. Abyo akyo byokiji, kabiji ne kwikiyukatu ne! Kilangulukaipo.

172 Inge mwabula mwanamulume nangwa mwanamukazhi, uji pa mukwakwa, uji mulekese, kabiji wa mwambila mba uji mulekese, kabiji bakonsha kwamba mba, “Ubangatu byobe,”

kika, paji kutama kwa milanguluko pantu pamo. Pajipo kintu kimo kyatama na milanguluko yabo.

<sup>173</sup> Kabiji inge mwakonsha kutanga Kyambo kya Lesa, bantu byo bakonsha kuuba, kabiji ne luwe lubatizhilo lwa Mupashi Wazhila lo tuji nalo leelo, kabiji, bantu, kika, bakumonatu obewa nobe wakonya. Wibabuula mba: “Uji na . . .” Bafwainwa kusemwa jibiji. Abo bafwainwa kuketekela Baibolo.

<sup>174</sup> Baamba mba, “Ajo jajinga jishimikila ja ki Yudeya, ja kunyuma kwine. Kipwilo kyetu kyo kiji na jishinda.” Wiwamanama, muyaji, mpofu, uji bwamba, ne kwikiyukatu ne. Kika . . . Kabiji Baibolo waamba mba ao ye musango ye bakekalamo.

Kyakonsha kwikala byepi ngauzhi wakine wakakalwa kwikimona? Amiwa kechi nayuka ne.

<sup>175</sup> Kibena kuya monse mu bipwilo byetu, konse konse. Anweba kimonaitu, kijitu mutachikilo ya katataka. “Awa pite wakala ne banabanji babakazhi,” wa mu Lumwekesho 17, kupana ku bantu “bakumulanda, bampofu, bayaji” lufunjisho lwanji lwa masukuulu a mamboawama apusanako na Kyambo kya Lesa. “Kabiji batana mwi aye muji myeo yabazha, banabalume ne banabakazhi ba—bakonse konse.” Mukifulo kya kukebula bantu . . .

<sup>176</sup> Kilishitu ushinikisha Kyambo Kyanji, akyo kikebula bantu. Aye kechi ukebula bantu ku bipwilo byakebulwa na madinominesheni akatampe ne ngubilo ikatampe ne, kabiji ne bikatampe bya-kutwajijila ne bintu byamweka kuwama ne. Pakuuba Kyambo kya Lesa kikebula Musongwa wa Kilishitu.

<sup>177</sup> Pano monai. Ke kintu kyawama bingi pa—pa kumona mba—mba kipwilo kyeseke kukebula milanguluko ya bantu na mikukumba yawama ne banyimbi bamvwala bulongo, kabiji ne banabakazhi baji na suki-yatendwa ne bilungi byo bapeta. Kabiji balanguluka mba . . . Kabiji bembamba nobe Malaika. Bubela nobe diabola, kunyema bufuku bonse nakuzha nobe, bino kafwapo kyo balangulukapo ne. Kabiji abyo byo balanguluka mba, “Kijitu bulongo. Akyo kyawama.” Bino, mwamona, akyo ke bubela-bwalengwa. Akyo kechi kyo Kyambo kya Lesa ne.

<sup>178</sup> Kabiji, Musongwa wabukine ukebula milanguluko ya Lesa, monka mukulama Kyambo Kyanji. Pano monai. Pano twayai tumone Kilishitu.

<sup>179</sup> Anweba mwamba mba, “Kyawama, pano, pembelaiko mineti umo, panonga akwe kulamba ko ubena kwambapo?”

<sup>180</sup> Aye Baibolo waamba, mu Isaya 53:2, amba, Yesu byo aishile, “Kechi mwajingapo buuya mwi Aye ne, kya kuuba mba Aye twakonsha kumutajisha ne.” Abyo ibyo? Kechi mujipo buuya ne. Inge Aye waishile mu buuya bwa muntanda, nobe byonka biji Satana leelo, bantu inge Aye bamunyemena kabiji ne

kumuswa Aye byonka byo booba na kipwilo leelo. Abo inge Aye bamwitabijile, ne kumutambulwila Aye, byonka byo booba Satana leelo. Kyakine, byo bafwainwa kuuba. Pakuuba Aye kechi waishile mu yewa musango wa buuya ne, bino Aye kimye kyonse wiya mu buuya bwa byubilo. Akwa, Kilishitu kechi wajinga walamba, mukatampe, wakosa, Muntu wazama ne. Lesa kechi usala bamusango yeo ne.

<sup>181</sup> Navuluka kimye kimo ngauzhi waile ku—na kusenda mfumu, na kwikajika mfumu mu baana bakwa Yese, pakuuba mba apingakene pa mfumu mukwabo, Saulo. Kabiji Yese wamuletele, mukatampe wanji, wabaya, nsongwalume wawama. Aye waambile mba, “Kisochi kya bufumu kikamweka bulungo, ku mutwe wanji.”

<sup>182</sup> Ngauzhi waile na ku mwitulwila manyi. Aye waambile mba, “Lesu wamukana.” Kabiji Aye wibakaine bonse, poso byo aishile ku mucheche, wa mapuzhi-asulubala, mulongo wa mwekelo-yamungye mungye. Kabiji aye wamwitulwijile manyi, ne kwamba mba, “Lesu ye wamusajile.” Mwamona? Atweba tusala na meso. Lesu usala ne byubilo.

<sup>183</sup> Byubilo, kechi kwajinga byubilo biji nobe bya kwa Yesu Kilishitu ne. Bikala mwi obewa kabiji bimumweshu Aye. Twamona mba kya kine. Kechi buuya Bwanji bwa muntanda bobukebula Musongwa Wanji ne. Ke byubilo Byanji, byubilo bya Kipwilo, Yesu byo akebako; kechi kuji bishimikwa byabaya ne, kuji madinominesheni akatampe, kuji bamembala bavula ne. Aye walaile kusambakana pamo konse kuji babiji nangwa basatu bapwila pamo. Kyakine. Amo waitabila kyakine mo mwaikala luketekelo lwanji, ke monka mu Kyambo kya Lesu kyashiniikishiwa na Bukine, byo kiji. Salai na Kyambo Kyanji, kechi na jibumba ja mwekelo-ya muntanda ne. Abo bashikwa kyokyo.

<sup>184</sup> Kechi kyakukumya mba Aye wamukuna ne, mambo watupila lumwekesho Lwanji, kabiji kechi uji nalo ne. Aye kechi wamuta muchima ne, musango wa byubilo ne mo obila, kabiji ne bintu bya muntanda byoaji nabyo.

<sup>185</sup> Aye ubena kutala byubilo byanji, byubilo bya Kilishitu. Pano, pa kakimyetu kacheche. Abyo byokiji. Aye wasala Musongwa amba amweshu byubilo Byanji, ku byo byo bipwilo byakatataka bya leelo kine byatupila Wanji—Wanji mutachi papo, mamailoshi mamilyoni, mambo abo bakana *Kikye* kwikala kya Bukine. Nanchi kyakonsha kwikala byepi? Pano, Aye ubena kukeba juba awa Musongwa po akalengwa, Bahebelu 13:8, byonka kine byo Kyajinga, byonka Aye byo ajinga. Kyafwainwa kwikala mubiji Wanji umo, bikupa bimo, Mupashi umo, bintu byonse pamotu, walengwatu musango umo, kabiji abo babiji bekala ke umo. Poso kipwilo kyaikala byo byo, kechi baji pamo

ne. Abya byubilo Byanji, Kyambo, kya ino nkulo, kyafwainwa kulengwa. Aye wafwainwa kulengwa byonka Aye byo aji.

<sup>186</sup> Pano, mukupezhako, Nasaka kwamba ene mambo o Naambila bibye bintu, kabiji Amiwa—Amiwa posakupezhako. Bufuku bukwapo, pepi nobe fili koloko mu lukeelo kelo, Bambushishe mutulo.

<sup>187</sup> Amiwa natola anweba bonse kupana mukumbu pa kikye. Bushe Amiwa ne mubuulapo kintu kintu mu Jizhina ja Nkambo kanatu kyonka kyalumbuluka? Kimye kyonse kikalatu kyalumbuluka. Nanchi nkwashai, Lesa wayuka mba akyo kya kine. Kechi kujipo nangwa kimo ne, kafwako nangwa kumo muntanda, mu byobya bya mubiumbi byaambiwa, akyo Aye kyo apusapo kyambo kimo kya mu kikye. Bimye byonse bifikizhiwatu bulongo.

<sup>188</sup> Ne ku kimye kyo Najinga ku Phoenix, juba jikwabo, nangwa mwaka umo wapitapo, kabiji ne mubuujile pa yoya Mbila ya—*ya Ing'anyi Kimye Kino Kyotujipo, Mwane?* Kabiji mwabujilwe mba, “Bamalaika Sebeni bankasambakana kokwa,” kabiji kikekala ko kushikulwa kwatotwa Tutetesho, kabiji kika. Kabiji kokwa awa—awa magazini wa *Bumi* wasendele sawakya wa kyokya, awe Mujilo mukatampe wailenga mwiulu, sate mailoshi kuya peulu, mu kukilang'anya kyajinga tweti—sebeni mailoshi. Abo baambile mba kechi be kiyuka mokyaila ne; kechi bakikiyuka ne pano ne. Kabiji banabalume baikala mu kino kishimikwa bufuku buno, baimene ponkapa ne amiwa byo kyamwekele, monka mo Kyaambijile. Aye wambujile mba bintu bikamweka, kabiji kyamwekele byonka byo kyajingatu. Monse atwa Tutetesho mo twashikukijilwe, kabiji ne nkumbula byafyamika byafyamikile mu mankulo aba kwalula bintu ne bikwabotu, byonka byo kyajingatu.

<sup>189</sup> Byepi, kasa twaimana peulu ya katumbatumba, banabalume, basatu nangwa foolo ba mwiabo baji muno ponkapano, ee, kyakila ne pa kyokyo. Kuya peulu ya katumbatumba, aye Mupashi Wazhila waambile mba, “Tola aja jibwe.” Twaile nakwipaya nyama. Aye waambile mba, “Jitaye mwiulu, ne kwaamba mba, ‘ABYO BYOBYAAMBA AYE NKAMBO.’” Amiwa ne kyubile. Panshi ponkapa pafumine mwela. Naambile mba, “Mu ma awala tweti—foolo, musa kumona kuboko kwa Nkambo.” Banabalume baikala muno pa kino kimye.

<sup>190</sup> Juba jalondejilepo, pepi nobe teni koloko, kasa naimana byobya, Naambile mba, “Ikalai benengezha. Twelai mushi yamotoka momwa,” mwine wapijilwa. Naambile mba, “Kintu kimo kibena kukebewa kumweka.” Jiulu jajinga mwabula makumbi, monkamwa mu mabwe akatampe. Kwaishile kazhimbiji ka Mujilo kufuma Mwiulu, kaishile na ngovu Kapangilenga ne kyongo, kafikijile mu bibumba bya mabwe.

Amiwa—Amiwa naimene monka mushi Yajo. Navujile kisochi kyami, nakwata ne ku mutwe wami. Kaishile kufika pepi peulu yami fili fiti nangwa foolo mafiti, kabiji kyachiba ne kimbo kyazhinguluka byobya, kabiji kyavuma ne kuvuma. Kabiji kabwelele mwiulu, kabiji kazhingulukile kabwela ne jikwabo, kabwelele panshi, bimye bisatu, kya kuuba mba kamokaula ne peulu ya bipupu, pa mayandi bitota bibiji. Mwibomvwa balongo kwamba mba, “Amena”? Abo bajingako byo kyamwekele, mwamona, kabiji kyavumine jisatu.

<sup>191</sup> Byo bafumine mu myotoka kabiji ne bintu byonse, babwelele jibiji, baambile mba, “Akya kyakonsha ku kufikila, kechi kwajinga ne kifulo kya ngilishi ne.”

<sup>192</sup> Amiwa naambile mba, “Kyajinga—Kyajinga Aye. Aye wajikwambanga kwi amiwa.” Lesa wamba kupichila mu kazhimbiji. Mwamona? Kabiji kokwa kwajinga awa Mumbulungwa wa Mujilo ye mumona pa kipikichala, kasa aimana.

Kabiji byo Kyaile peulu, baambile mba, “Kyokika?”

Naambile mba, “Luzhachisho lubena kufikila ku Kitulu kya Kumuzhika.”

<sup>193</sup> Juba jalondejilepo kufuma popa, Alaska wajitu pepi kwibila. Mwamona? Kyafikile jimo, kokwa, kipumo kitanshi.

<sup>194</sup> Kwepi, wafwainwa kubapo kintu kimo, pa kwikipashang’anya. Kijitu pamo nobe mwanamulume wabikile mukele mu botolo, kabiji wamutaya ne pa meema, ne kwamba mba, “ABYO BYOBYAAMBA AYE NKAMBO, lekai kwikale meema atobala.” Kabiji ne mukwabo, Yesu, watolele meema ne kwietulwila mu mulondo, kabiji—kabiji walengele binyu kufuma ku meema.

<sup>195</sup> Obewa wafwainwa kwikalapo na kintu kimo, kya kupashang’anya nakyo. Akya byo kyajinga, akya kyaile mwiulu ne kubwela panshi. Akya kyo kyatatwile aka kazhimbiji ka kacheche. Mukachi ka ma awala tweti-foolo, Kyasukanyishe yewa mutumba poso kyalala ne mufolo mukatampe kuzhokoloka.

<sup>196</sup> Rev. Mr. Blair waikala papo, Mbena kutala pe aye ponkapano, aye wajinga konka kabiji watolelepo ne amo alalaikile, kabiji ne bikwabotu. Kuno kuji Terry Sothmann, ne bakwabo, baimana papo, ne Billy Paul. Kabiji balongo, bamo bamubaabo bakwabo baikala muno, bajinga konka bekimwene byo Kyalajikilenga.

<sup>197</sup> Akyo kechi kya kufwanyikizha ne. Abo bukine. Akyo kechi kyajinga kunyuma mu mooba a Baibolo ne. Kyonka kino kimye. Mwamona? Awa yeka Lesa umo umweesha bibye bintu, kabiji byafikizhiwa, monka mo kyamwekejile. Kikyanyge



ku kakalwapo nangwa jimo ne. Bino Amiwa mbeni kwamba nakwitotela mwi Aye.

<sup>198</sup> Milungu icheche yapita, Najinga na kimwesho. Kabiji Naimene popa pa—pa mpuzha ya peulu, kabiji Namwene mwekelo ya lutwe lwa Kipwilo. Kabiji Namwene, kufumina kwami ku... Amiwa naimene nobe *muyuwe* musango, natajile ku Muzhika. Kabiji kwiya kufumina *kukwe* kwajinga jibumba ja banabakazhi balamba, mandeleshi awama bingi, suki yalepa yo bakashila bulongo panyuma, malaya alepa maboko, ne masiketi alepa bulongo. Kabiji bonsetu bajinga mu lwimbo wakufotelelamo, nobe, “Twayai, bashilikale Benakilishitu, kuya ku nkondo, na musalabu wa Yesu kasa abena kuntangijila.” Kabiji byo bapichilenga, Naimene, kabiji kwajinga Kintu kimo kokwa, Mupashi umo, wajinga Lesa, kabiji waambile mba, “Awa ye Musongwa.” Kabiji Natajile, kabiji muchima wami wajinga bingi na lusekelo. Kabiji Waile wazhokolokela *kukwe* ku lubaji, wapita ne kunyuma yami.

<sup>199</sup> Pakuta kimye kicheche, byo abwelele jibiji *lulwe* lubaji, Waambile mba, “Pano kipwilo kyakataka kisakwiya mu mwekelo ya kulutwe.” Kabiji kwaishile kipwilo kyabena Asia. Amiwa kechi na kimonapo jibumba jiji nabiko byobya ne.

<sup>200</sup> Kabiji ke biye bipwilo bikwabo, bya byaalo byapusanapusana. Abo bajinga na mwekelo yatama bingi.

<sup>201</sup> Kabiji Ami—Amiwa naamba kikye mambo akuuba mba Njina mwingilo wakubulang’ana bukine, ku meso akwa Lesa. Kabiji Aye byo aambile mba, “Pano kino kiiya ke kipwilo kya America, mwekelo yakyo imwekanyike,” inge Namonapo kala jibumba ja badiabola, jajinga joja. Aba banabakazhi bajingatu mulekese, na kakitu kakala kaji na mwekelo-yatokoloka, nobe musombelo wa kikoba kya nzovu. Kabiji be kalamine palutwe yabo, kwakubula ne kyakwiulu nangwa pachechetu ne. Kabiji baubilenga bibye, nobe, ao—ao mazha obazhapo banyike kuno, akwa kwizhobakanya ne bintutu bikwabo, ne yewa musango wa nyimbilo kasa ibena kuvuma. Kabiji Amiwa byo namwene Ina U.S.A. waiya, Nashi nkapungile.

<sup>202</sup> Pano, akye ke ABYO BYOBYAAMBA AYE NKAMBO. Inge anweba mwaketekela mba ne kalume Wanji, anweba muketekele ponkapano. Amiwa kechi nakonsha kwamba kyokyo kintu kyabula bukwasho pantanda ne. Kechi mujipo mali avula muntanda akonsha kundengela amiwa kwikyamba inge kechi kya bukine ne.

<sup>203</sup> Kabiji byo aishile, akya kyajinga kintu kyamweka—kutama bingi kyo Nakimonapo kala. Nalangulukile mba, “Lesi, atweba basapwishi ne balongo twaingila kyakosa bingi mu kwi Mumwena Musongwa, kabiji mo monka mwakila kuwama mo twakonsha kubila.” Aye waendelenga nakuzhisha mubiji, kasa akwachijila *kikye* palutwe yanji, kijitu pamo nobe siketi

wakuzhilamo, kasa bekikwata palutwe yabo, pa lubaji lwanji lwa kushi, nobe *bibye*, na kuzha ne kwenda nakuzhisha mubiji byonka byuba banyike ku . . . pa bikope byatama byo bamweshwa, na kuzhisha mubiji. Awa wajinga Ina Mwinakilishitu wa mu America.

<sup>204</sup> Nanchi nkwashai, na bukwasho bwa Lesa, abyo byo kyamwekelenga mu kilungi Kyanji. Ami—Amiwa naubile. . . Natatula . . . Amiwa nafwaijilwe kupungila. Nalangulukile mba, “Kweseka konse, ne kusapwila, kabiji ne kukajikizha?” Bonse bajinga na suki yakwichika, kabiji bailenga na kuzhisha mubiji ne bintutu bikwabo, kasa bakwachijila *bibye* palutwe. Baishile bafika, ponka po Naimene popa na Kilengwa kyakila pa lubaji lwa buntu. Amiwa kechi na Mumwenenga ne. Namumwine Aye kasa abena kwamba kwi amiwa; wajinga pepi ne amiwa. Pakuuba byo baalulukijile *kululwe* lubaji, bakwachile *bibye*. Kabiji bazhinshishenga mibiji yabo ne kuseka kabiji ne kuya kulutwe, ne kutwajijilatu byonkabya, kasa bakwatwa *kikye* palutwe yabo.

<sup>205</sup> Pano, amiwa kasa naimana mu Kyeenyi Kyanji byobya, kabiji kalume Wanji. “Kabiji pa byonse byo Naesekele, akya kyo kyakila kuwama kyo Nakonsha kuuba?” Nalangulukile mba, “Lesa, ng’anyi buwame bo kyauba kwi amiwa? Buwame ka bo kyaubile? Kujila konse, ne kusashijila, ne kukajikizha, kabiji ne biyukilo bikatampe ne byakukuma kabiji ne byabulume Anweba byo mwamweshwa. Kabiji byo Naimene byobya, ne kuya ku nzubo na kujila panyuma ya kusapwila kwi abo ne bintutu bikwabo, kabiji ng’anyi buwame bo kyaubile kwi amiwa? Kabiji pano Amiwa nakonsha kuleta kintu kiji yewa musango kwi Anweba, kwikala Musongwa?”

<sup>206</sup> Kabiji byo Naimene bobya, na kutala, aye wapichile. Kabiji anweba mwakonsha kulanguluka lubaji lwa nyuma yanji, yabula nangwa kintu kimo ne, kasa akwata *kikye* palutwe yanji enda wenda na kuzhisha mubiji wanji pakatampe, byobya, na kukwe kuzhisha mubiji, na kutaya maboko anji byobya. Kabiji, aye, wajinga wa bumwenga, ne byo baubilenga, mubiji wanji na kumuzhisha yense byobya. Pano Amiwa . . .

<sup>207</sup> Mwaamba mba, “Kyalumbulula ka, Mulongo Branham?” Amiwa kechi nayuka ne. Amiwa mbena kwimubulatu kyo Namwene.

<sup>208</sup> Kabiji byo apichile byobya, Amiwa namutajile. Oo, Amiwa kine napungijile. Amiwa naalulukile kuzhokoloka. Nalangulukile mba, “Lesa, Amiwa nazhatwa. Kechi—kechi kujipo amiwa kweseka pa kino kimye ne. Nakonsha ne kwikilekatu.”

<sup>209</sup> Mrs. Carl Williamas, inge mwaikala muno, kabiji ne kyokya kiloto kyo mwambujile, pa kimye kicheche kyapita, akya kyo

mwajinga nakyo bufuku bukwabo, akyo kimukatezhenga, abyo byokiji. Kindilaivo kyaangatwa mu kuboko kwami.

<sup>210</sup> Nanchi, Nalangulukile mba, “Na—Nafwainwatu kwikilubako.” Amiwa byo naile.

<sup>211</sup> Nanchi, ponkapotu, Amiwa ne Kyumvwine kasa kiya jibiji. Kabiji waishilenga ku *lulwe* lubaji yenka Musongwa umo waile wazhokoloka *kululwe* lubaji. Abo kebeye aba bainetu babacheche ne jikwabo, kabiji umo umo bamvwajile mwaila vwajilo ya byaalo byabo ko bafuma, nobe Switzerland, Germany, ne bikwabotu, umo umo wamvwajile musango wa vwajilo yabo, bonse na suki yalepa, pamotu byonka byajinga mutanshi. Kabiji byo baishilenga, na kwenda. “Twayai, bashilikale Benakilishitu, kuya ku nkondo.” Kabiji bonse byo bapichile pa kwimena ponka po twaimesho, ponkapotu, meso onse atajile kumo. Kabiji nanchi baalulukile, kabiji byo bayile, na kufoola.

<sup>212</sup> Kabiji byo batatwiletu mba bayenga mwiulu, awe mukwabo waile kwapela katumbatumba kabiji wakukulukile, nobe *byobya*.

<sup>213</sup> Abo batatwile kuya mwiulu. Kabiji byo bafuolelenga, Namwene bansongwakazhi bamo babacheche bajinga kunyuma, bamwekele nobe bansongwakazhi ba mu byaalo bingi, nobe Sweden nangwa Switzerland, nangwa kuntu kukwabo. Batatwile kukeketa konse konse, kabiji bajinga... Naambile mba, “Kechi mube kyokyo ne! Kechi mufume muntampulo ne!” Kabiji byo Nabijikile byobya, Nafikile ku, monka mu kimwesho, naimene na maboko ami *byobya*. Nalangulukile mba, “Kyawama...”

<sup>214</sup> Ao oene mambo o Naambila byo Naamba, bufuku buno. Nasaka kukwipuzha obewa jipuzho. Bushe kiji palutwe kukila byo tulanguluka nyi? Bushe Aye waitwa kala ne kusalululwa, kabiji ne kubikwa katetesho? Kechi kukekala wakilukapo ne, mwayukatu. Bushe kyakonsheka kubiwa? Oo, ee. Oo, ee.

<sup>215</sup> Vulukai kyo Naambile, juba jikwabo pa kajo kakwiauula. Mu mutanchi wa lusemo lwa mwanamulume ne mwanamukazhi, kuji tubishi mamilyoni, mamilyoni a make alupuka. Bino pekalatu kamo kekala na bumi, kabiji, nangwa byonkabyo, bonse bekalatu na mwekelo ipasha: kamo mu mamilyoni. Pabonsetu ba mwi abo, jike ja musango umo kabiji ne musango umo wakakishi. Kamo ka mwi abo kekala na bumi. Twashala tufwa.

<sup>216</sup> Kafwako nangwa umo wakonsha kubulang’ana kana ye wepi watetula jike, kabiji, oo, pano ngakyo. Lesa ye wafwainwa kufukula kyokyo, kana usakwikala nsongwalume nangwa nsongwakazhi, wakosa nangwa wasuki ifita, nangwa mu musango yense mokyakela. Lesa ye ufukula kyokyo. Kechi mutanshi ye ukumanya ne, pakuuba mutanshi Lesa ye afukula. Kape umo waishila *kukwe*, kabiji umo... Inge mwakonsha

kumona, mu mupaipi wa kupiminamo, pa kwitumona twaishila pamo. Amiwa ne kimonapo. Lesa ye wafwainwa kufukula kyokyo. Umo, mu abo bonse, pamo nobe, kana monka mu kusalululwa. Kusemwa kwa ku mubiji ke kwa kusalulula. Lesa utolamo umo kufuma mu mamilyoni.

<sup>217</sup> Kimye Isalela kyo afumine mu Ijipita, pa mukwakwa kuya ku ntanda yamulaye, bajinga bantu pepi nobe tuu milyoni. Bonse bajinga panshi ya kitapisho kya mwanamukoko, inge ne kechi bafwajilwe kwikala na bumi ne. Bonse batelekelenga kwi Mosesa, aye ngauzhi. Bonse babatizhilwe, mu Kalunga Kachila. Bonse bazhilenga, banabakazhi ne Milyama, peulu-ne-panshi ku lubaji lwa (kimye) kitulu kya kalunga, kimye Lesa kyo aonawine balwanyi. Bonsetu baimene ne Mosesa, kabiji bamumvwine kwimba mu Mupashi. Abo, bonsetu, bajilenga manna mungyetu, aponenenga kufuma Mwiulu. Manna apya, kila bufuku, akyo ke kipasha kya Mbila, bonsetu bajilenga konka. Pakuuba, kufuma mu tuu milyoni, baanga bafikizhe? Babiji. Umo wafuma mu milyoni umo.

<sup>218</sup> Kuji pepi nobe Benakilishitu faivi aduleendi milyoni pa ntanda bufuku buno, kubelenga ba Katolika ne bonsetu. Faivi aduleendi milyoni batelwa-mba baitabila pantanda. Inge kushikulwa kwaiya bufuku buno, akyo kyalumbulula mba. . . inge umo kufuma mu milyoni byo kwajinga kubelenga. Amiwa kechi naamba mba byo kiji ne. Bino inge byokiji, bantu faivi aduleendi, mu ma awala tweti-foolo alondelapo. Anweba kechi mwakonsha ne kwikumvwapo ne. Kwakonsha kwikala bavula bazhimang'anatu, nangwa byonkabyo, kechi bakonsha ne kuvulukwa ne.

<sup>219</sup> Pano kyakonsha, kumweka kwi atweba, mulunda, nobe byo kyaubiwe kimye Yoano Mubatishi kyo aishile. Ne banababwanga baambile mba, "Kika Binembelo kyo byaambila mba, kika ba—batumwa nangwa bangauzhi kyo baambila mba, kika kyo baambila mba Elaija wafwainwa kwiya patanshi na kubwezha bintu byonse?"

<sup>220</sup> Aye waambile mba, "Nemwambila namba Elaija waiya kala, kabiji kechi mwikiyukile ne."

<sup>221</sup> Juba jimo tukashala kasa twaikala byonkabye, "Pano ibyepi Kushikulwa lumanamo kasa lukyangye kufika?"

"Lwaiya kala kabiji kechi mwikiyuka ne."

<sup>222</sup> Mubiji Yense, wabikwa katetesho, ne ku Mulama mu ntampulo. Amiwa kechi mbena kwamba mba byo kiji ne. Naketekela mba kechi kiji byo byo ne. Bino, mulunda, inge kyaleka. . .

<sup>223</sup> Inge tuji na kyakukabila mu michima yetu, bufuku buno, twafwainwa kuwamisha bumi bwetu, kabiji ne bintu byo twauba, lekai ne mupe bukwasho, nobe mulongo wamwingilo. Amiwa nsakwamba kikyee kimye kitanshi, ku pulupiti. Nafika

palepa bufuku buno, pa *Kikye*, kukila byo Naubapo kala pa kintu kikwabo, pa kimye kiji kyonse, byonkabyo, ku meso abantu bavula, mambo Amiwa najinga wakasuluka bingi mu kukwe kupwila. Inge mwaketekela mba amiwa ne ngauzhi wakwa Lesa, telekai ku byo Nemwambila. Inge pajipo kakitu kamo ko ubena kumvwa mu muchima obe, yanga kwi Lesa ponkapano. Obewa wikyube.

<sup>224</sup> Imanaiko pa mineti umo, bantu. Talai pa—pa mafunjisho enu a bantu o mwingijila. Talai mu bipwilo byenu. Bushe kine byokiji na Kyambo kya Lesa? Obewa wafikilamo mu byonse bikebewa nyi? Waamba mba, “Amiwa ne muntu wawama.” Nanchi byo kyajinga ne Nikondema, kabiji ne bashala byo kyajinga. Abo—abo bajinga bawama. Mwamona? Akyo kechi kijipo na kimo kyakuba na *Kikye* ne.

<sup>225</sup> Kabiji, banabakazhi, Nasaka anweba mutale mu ngalashi, kabiji monai Lesa kyo amukebela mwanamukazhi mba obe. Kabiji monai mu ngalashi ya kwa Lesa, kechi mungalashi ya kipwilo kyenu ne, mu ngalashi ya kwa Lesa; kabiji umone kana wakonsha kufikilamo, mu bumi bobo, kwikala Musongwa wa bumupashi wa Yesu Kilishitu.

<sup>226</sup> Bamwingilo, langulukilai mu musango umo. Mwakonsha kusezha *pakikye*, pakuuba mba mubule kukozha muntu pa muchima? Mwakonsha kuuba *kikye* inge kechi kyajinga... kabiji bakonsha kwimupanga mu kipwilo? Inge mubena kumvwa muye musango, mulongo wami mutemwe, lekai nemupe lujimo, mu Jizhina ja Yesu Kilishitu, fumai ku kyokyo ponkapano.

<sup>227</sup> Kabiji, inetu, inge kechi wakonsha kufikilamo mu kipimo kya Bwinakilishitu ne, kechi kwikalatu Mwinakilishitu wa byonkabyo ne, kana mu muchima obe, ne bumi bobo bwafikilamo bulongo nobe kitupa kya masongola a kwa Lesa, muno, kyaamba mba byo kyafwainwa... .

<sup>228</sup> Kabiji, membela wa kipwilo, inge kipwilo kyobe kechi kiji byobyone ne, kupimwa kwi Lesa mwaila kufikilamo kwa Kyambo Kyanji, lupukaimo mwi akyo ne kutwela mwi Kilishitu.

<sup>229</sup> Alo ke lujimuno lwabaya. Atweba kechi twayuka ne kana ng’anyi kimye, kabiji obewa kechi wayuka ne kana ng’anyi kimye, uno muzhi juba jimo po akekala panshi ya kalunga ka meema.

<sup>230</sup> “Oo, Kapenama,” byo aambile Yesu, “obewa witumbijika mwiulu, ukaletwa panshi mu kalunga kabafu. Mambo, inge mingilo ya bulume ya ubiwe mu Sodoma ne Gomola, inge wakimana kufikizhiwa ne buji leelo.” Kabiji Sodoma, Gomola biji kushi ya Kalunga ka Bafu. Kabiji Kapenama uji panshi ya kalunga.

<sup>231</sup> Obewa muzhi, witumbijika kwikala muzhi wa Bamalaika, witumbijika kufika ne mwiulu, kabiji yotampilo ya ndochi yonse, ne bintu byonse byatama bya mafwashi kabiji ne

bikwabotu, poso ne byaalo bingi biya kuno na kusenda busaji bwetu ne kwibutwala kungi, ku bipwilo byenu ne mikungu, ne bintutu bikwabo, mwaila byo muuba. Vulukai, juba jimo mukekala panshi ya kalunga ka meema, bukata bwenu bwabuuya buji pe anweba kino kimye. Bukaji bwa Lesa bujitu pepi ne anweba kunyuma yenu. Bimye biinga Aye byo akakwachijila yuwe mushiji peulu ya kyokya? Kimye, aka kalunga kokwa, kazhika mailoshi umo, kakatezhimukila momwa, kuya kufikatu ne Mukalunga ka Sautona. Kikekala kyakila mukutama kukila juba japeleleko ja Pompeyi. Lapilai, Los Angeles.

<sup>232</sup> Lapilai, anweba mwashala, kabiji alulukilai kwi Lesa. Kimye kya bukaji Bwanji kiji panopantanda. Nyemai kimye kyakunyema kasa kijikonka, kabiji iyai mwi Kilishitu.

Twayai tulombe.

<sup>233</sup> Lesa Mutemwe, byokiji, mu mupashi wami, mubena kuzakama, muchima wami ubena kuponsha mipolo ya lujimuno. Kiswishai, Anweba Lesa, kya kuuba mba banabalume ne banabakazhi kechi balanguluke mba Naamba bisela ne, kabiji bantu ba mu kipwilo kechi balanguluke mba kyajinga kintu kyakufukwila jimo nangwa kya kwibapata ne. Lekai bamone, Nkambo, kekyo mu butemwe.

<sup>234</sup> Anweba mwanymenako bukamonyi, Lesa Wabulume bonse, kuuba mba peulu-ne-panshi ya kikye kitulu Amiwa nayako, pamwaka pamwaka, na kushimuna Kyambo Kyenu. Ng'imenaike bukamonyi, Anweba Lesa, inge kyakonsha kumweka bufuku buno, Amiwa naamba Bukine. Anweba mwayuka mba kikye kimonwa kya Musongwa kya Bukine. Natolele Jizhina Jenu pa kikye, Nkambo, kabiji naambile mba kyajinga ABYO BYOBŶAAMBA AYE NKAMBO. Kabiji Amiwa mbeni kumvwa mba Nayuka, Nkambo, kyo Mbeni kuuba.

<sup>235</sup> Nanchi Nemulomba Anweba, Nkambo, mwi Yesu mu Jizhina, lekai bantu be sukanye abo bene, bufuku buno, kabiji banyeme kufuma ku bukaji ubena kwiya, mambo Lukumo lwafumapo kyanembwa pa bibelo kabiji ne mu byaalo byonse. Kiyukilo kifita kyanweka kukilang'anya konse konse. Aye Mupashi wa kwa Lesa wafumishiwapo mambo a kumufichisha pa muchima, kabiji bapimwa pa shikelo ne kutanwa na mambo. Kijiilo kya kwa Mfumu Nebukaneza kyabwezhiwapo ne jikwabo, na bijiiilo bya kupendwa kabiji ne banabakazhi bamvwala-kichika, betela bene mba Benakilishitu.

<sup>236</sup> Anweba Lesa wa Mwiulu, ubai lusa pa ino ntanda ya bubi ne pa bantu ba bubi, Nkambo, nobe byotuji bufuku buno. Lesa, Mbeni kweseka kwimana pa kachi ne kwipuzha lusa lwa Bulesa, amba Anweba musa kwamba ku jije jibumba bufuku buno ne kwita Musongwa Wenu ku milanguluko, Nkambo, kechi kwenda na kiyukilo kya mafunjiisho a bantu ne, pakuuba monka mwaila

kuvuma kwa Mamboawama a Nkambo Yesu Kilishitu. Kiswishai kye, Anweba Lesa. Lekai kiyukanyikwe, bufuku buno, amba Anweba mwi Lesa, kabiji Kyambo Kyenu bo Bukine. Mukimye, kilenga moyo, kumeso a babo bantu, twaita milanguluko yabo ku Kyambo Kyenu.

<sup>237</sup> Mu Jizhina ja Yesu Kilishitu, Nebalombelela, Nkambo. Bemumona Anweba, kwakubula ne kuzhinauka ne, kwenda mu mabumba abo ne kwibabula biji mu michima yabo. Kabiji Anweba mwayuka, Nkambo, amba, ponkapano, kika kibena kubiwa. Anweba mwayuka mba bya Bukine, Anweba Lesa. Kabiji Amiwa ne mulomba Anweba, mwi Yesu mu Jizhina, lekai Mupashi Wazhila ne jikwabo asashijile, Nkambo, kabiji afume kujije jibumba, Nkambo, abo banembwa mu Buuku wa Bumi wa Mwanamukoko. Kiswishai kye, Anweba Lesa. Nalomba na muchima wami yense.

<sup>238</sup> Abo bantu, mwaila kitemwa, Nkambo, bakonsha kupa jali jo bajinga najo, pakuuba mba batundaika Mbila. Bakonsha kuuba kiji kyonse kyo bakonsha kuuba. Bino, Anweba Lesa, inge kyafika pa kwesakena pamo Nakyo, kabiji ne kwiya mwi Akyo, Nalomba, Lesa, amba buno bufuku Anweba musakwibafweta ne kwitulwila Mupashi Wenu Wazhila pa ino mbung'eno. Kabiji kechi kwikale kuseka nangwa kukilauka ne, kana jibingo ne kujila, kabiji ne kulapila, na kukwachijila ku masengo a kitapisho, mu kimye kyo tubena kumona luzhachisho na kwiya kotuji, bufuku buno. Kiswishai kye, Lesa. Nalomba na bukishika nobe byonka byo Nayuka mwakubila, mu Jizhina ja Yesu Kilishitu.

<sup>239</sup> Mulongo wami, nyenga, Ami—Amiwa kechi nayuka bya kwamba bikwabo ne, inge Natana lusa ku meso enu, kupichila mu bulume bwa Lesa, inge mwaketekela amiwa kwikala ngauzhi Wanji. Akye kyo kimye kitanshi muvula ya bantu kyo Naamba kyokyo. Bino Amiwa mbena kumvwa lujimuno lwapusanako. Amiwa kechi naikalatu kwakubula bibye ne. Anweba mwayuka mba Amiwa kechi byonji ne. Amiwa kechi nguba bibye ne. Amiwa ne bwelelengamo kwamba iye Mbila kabiji ne kwamba byo byo bintu. Amiwa nyemena mu mbaji ne kuuba bintu bikwabo, pakuuba mba mbule kwikyuba. Bino Kyaambiwa, kabiji Kikemana pa Juba ja Kije, nobe kamonyi amba naamba Bukine. Kuuba mba ABYO BYOBYAAMBA AYE NKAMBO! . . . ? . . .

<sup>240</sup> Oo, Petekositi, nyemai bumi bwenu. Nyemenai ku masengo a kitapisho ne kujila, kimye kasa kikyanye kupwa ne, mambo kimye kikeya kyo mukajila bino kechi kikobapo nangwa kimo kyawama ne. Mambo Isao wakebele kutana mpuzha, ya bubeji bwanji, bino kechi wibumwene. Nakupana obewa, oo, California. Oo, mbung'eno ya Full Gospel Business Men, bo Natemwa, bo Nasha ne kwibakasa, na muchima wami yense, Ne mupana anweba kwi Yesu Kilishitu, bufuku buno.

Nyemenai kwi Aye! Kechi muleke diabola emulengele kwikala ba munyango ku Kikye ne. Ikali bulongo Nakyo poso mwauba, bonsetu, bayula na Mupashi Wazhila, kyakuuba mba, kyakonsha kwi mulengela kwiya ku kikye Kyambo, akyo kikalengela anweba banabakazhi kwikala baoloka, abo bakalengela anweba banabalume kwikala baoloka. Inge waamba mba uji na Mupashi Wazhila, kabiji wabula kwikala pamo na Kyambo, ke mupashi mukwabo mwi anweba. Mupashi wa Lesa uji pa Kyambo Kyanji, bu Mesiyasa, Kyambo kyashingwa manyi. Aye Musongwa wafwainwa kwikala musango wa-Bumesiyasa, Kyambo kyashingwa manyi.

<sup>241</sup> Twayai twimaneko, mu Jizhina ja Nkambo Yesu Kilishitu. Inge kechi mukomvwa jiwi jami ne jikwabo. . . Bino, inge Lesa waswa, Amiwa natala ku Africa, mu maawala achechetu. Amiwa kape kechi nakonsha kubwela ne. Amiwa kechi nayuka ne. Bino Nemubula, na muchima wami yense, Nemubula anweba bya Bukine. Amiwa kechi nabula kwimubula byonse Lesa byo ambula mba ng'ambe ne. Kabiji Amiwa Nebyambila mu Jizhina ja Nkambo.

<sup>242</sup> Ke kimye kilengsha moyo. Amiwa kechi nayuka mwakwikyambila ne. Naeseka kusha pulupiti jisatu nangwa bimye foolo, kabiji Nakakalwa kwikyuba ne. Akino ke kimye kilengsha moyo. Anweba kechi mulubeko ne. Akino kyo kimye kya, kapepo, Lesa ubena kwita lwito Lwanji lwapelako. Amiwa kechi nayuka ne. Aye uketa lwito Lwanji lwapelako, juba jimo. Kimye ka? Amiwa kechi nayuka ne. Bino Amiwa mbena kwimubula, monka mwaila akya kimonwa, kya mweka kuuba mba kape Musongwa uji pepi kupwa.

<sup>243</sup> Talai pa bipwilo bijitu na mazhina bibena kwiya. Inge kisungu wakosama waiya na kukeba Manyi, aye wakakelwe Kwiatambula. Aye Musongwa watwelele mukachi. Akwa Kushikulwa kwaikaleko. "Kimye kyo baile na kupota Manyi, aye Musongoshi waishile."

<sup>244</sup> Obewa walala nyi? Buka, bukiji bukiji, kabiji ulangulukepo obewa mwine. Kabiji twayai tulombe, umo umo, nobe tubena kufwa pa uno mineti, mu Jizhina ja Nkambo. Twayai, umo umo, mulombe mu jishinda jenu.

<sup>245</sup> Lesa Wabulume bonse, ngubilai lusa. Nkambo, ngubilai lusa. Ntubilaiko lusa bonse. Ng'anyi buwame bo kibena kuuba, nangwa tube ka, inge twakakalwa mu bibye bintu? Naimana na kulomba lusa, Anweba Lesa, uno muzhi mukatampe kasa akyangye kwibila panshi ya kalunga ka meema kabiji ne luzhachisho lwa Lesa kufika mu kino kitulu ne. Nalomba, Lesa, amba Anweba muketa Musongwa Wenu. Nebapana kwi Anweba pakino kimye, mu Jizhina ja Yesu Kilishitu. Amena. Amena. . . ? . . . Amiwa naamba kyakine. . . ? . . .





*KUSALULULWA KWA MUSONGWA* KDE65-0429E

(The Choosing Of A Bride)

Ino Mbila na Mulongo William Marrion Branham, yalupwilwe patanshi mu Kizungu pa Kina mabaanga abufuku, 29 Mulombola, 1965, kupwila kwa ba Full Gospel Business Men's Fellowship International ku Otela wa Biltmore ku Los Angeles, California, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)